

میکر سکوب

أدب ساخر

إيمان إبراهيم



ليين للنشر
والتوزيع

إيمان إبراهيم

ميكروسكوب

رقم الايداع / ١٠٧٦٨ / ٢٠١٤ ط١

الترقيم الدولى / ٦ - ٧٢ - ٥٣١١ - ٩٧٧ - ٩٧٨

غلاف / قسم التصميم بفريق رسم عقل

حقوق الطبع محفوظة لدى الناشر

ليليت للنشر والتوزيع

الإشراف العام / إيمان سعيد

هيئة تحرير ومراجعة

د/ سالم ابراهيم سالم

أ / رشا زقيرق

أ / محمود السيد

المراسلات : ٦٠ ش سكنية بنت الحسين

كفر عبده - الإسكندرية

ت : ٠١٢٢٤٢٧٢٣٢٧

: ٠١١٤٤٥٩٥٧٥٧

Dar.lilite@gmail.com

lilitepublishing@gmail.com

www.lilithpublishinghouse.com

إهداء

إلي معلمي ..

الأستاذة رانيا أول من كشف لي عن قدرتي علي الكتابة وبدأ يغرس بداخلي الحلم .. و الأستاذة جيهان التي طالما ساعدتني علي رسم ملامح الحلم صاحبة الجملة السحرية في حياتي (هتطلعي حاجة من اتنين يا كاتبة كبيرة يا إما دكتورة) .

ليتهم يقرأون هذا الكلام ويتذكروني ...

إلي أمي .. التي طالما آمنت بي وبقلمي رغم أنها لم تقرأ الكثير من كتاباتي .. إلي أخوتي وأصدقائي ممن آمنوا بقلمي وظلوا يدفعوني للتحلي بشجاعة إخراج سطور قلبي لعالم أوسع من تلك الدائرة الضيقة التي تحتضن كتاباتي ... لو يتسع الكتاب لظللت أكتب إهداءات لن تنتهي فقد منّ الله عليّ بنعمة أحمده كثيراً عليها وهي إيمان كثير ممن حولي بقلمي ودفعهم لي وتشجيعهم الدائم في كل وقت فشكراً لكم جميعاً والشكر لله أولاً وأخيراً ..

مقدمة

مرات قليلة اللي قررت فيها أبدأ كلامي بمقدمة ، فأنا في العادي لا أحبذ مقدمات الكلام وأحب الدخول في الموضوع علي طول ، لأنني مقتنعة إنه إن بدأ الكلام بمقدمة فهناك مشكلة ما في الكلام نفسه وتلك المقدمة تبرر أو تمهد الطريق للصدمة التي تلحق بضرب الموضوع بعد سرده كاملاً ، لذلك كنت واخده قرار من زمان يفني بعدم قراءة أي مقدمة لأي كتاب إلا ما رحم ربك وإن قرأت المقدمة كنت بقراها بعد ما أخلص الكتاب بحيث يكون الواحد خلص الموضوع نفسه ولو في صدمة ولا حاجة في محتوى الكتاب أكون أخذتها خلاص ، وده لقناعتي بالمثل اللي بيقول « وقوع البلا و لا انتظاره » ، لكن مع مرور الزمن اكتشفت إن الكلام ده يمكن استخدامه مع الكتاب المشاهير أو كاتبك المفضل فقد أصبح بينك وبينهم علاقة فكرية تجعلك علي علم بمضمون الكتاب أو اتجاه الكاتب قبل البدء في قراءة ما كتبه ... و حيث إني مش كاتبة معروفة و ده أول كتاب ليا فبالتالي القاريء مش عارف نوع قلبي ولا اتجاهاته ولا ميوله الفكرية اللي هتترجم جوه الكتاب لسطور ومقالات ، لذلك قررت إني أكسر

مبكر سكوب

القاعدة اللي اتعودت عليها وأبدأ الكتاب بمقدمة كنوع من التعارف بينا وربنا يديم المعروف ان شاء الله .. وكنوع من التعارف هبدأ زي ما إحنا متربيين ومتعودين لما نيجي نتعرف علي حد

أنا إيمان إبراهيم من مواليد ١٥ مايو ١٩٩٢ ، بنت مصرية أسكن في أحد الأحياء الشعبية في القاهرة وده أتاح لي الفرصة إني أعيش عيشة مصرية بجد وأشوف المعاناة والمشاكل اليومية في حياة المواطن بعيني مش بودني من خلال قصص بسمعا من حد غيري وبكتها بقلم بارد عمره ما عايش القصص اللي بيكتها ..

بدأت الكتابة والالتفات لقدرتي علي التعبير بالورقة والقلم في الصف الخامس الابتدائي حين بدأنا نكتب مواضيع التعبير في المدرسة ، لفت نظر معلمي قدرتي علي صوغ مواضيع بتعيري أنا دون اللجوء لمقدمات وخواتيم محفوظة ومحشور بينها سطرين أو ثلاثة كلامهم متناثر وده علي قولها هي مش شكرانية في نفسي يعني ، وفضل الموضوع يكبر معايا كل ما أكبر وأتنقل لسنة جديدة ومعلمة جديدة وألاقي نفس نظرة الإعجاب في عينيها لحد ما بدأوا يشجعوني بشكل مباشر في المدرسة وفي البيت علي التمسك بالحلم وتحقيقه ، فصدقت نفسي وعشت علي أثر الكلمات اللي كانت بتشيد بقلمي وفضلت أتخبط في الكتابات بين القصص القصيرة الطفولية وبين القصص العاطفية

رسم عقده

وبين المقالات الفلسفية وكل وقت وسن كان له تأثيره علي قلّمي لحد ما القلم اختار الأدب الساخر والحكايات الواقعية فلزق فيهم وحلف ما هو متحرك عنهم أبداً وفضلت أكتب في كل مناسبة وكل حدث حتي إني أحياناً كنت لما أزعل أستني الكل ينام واطلع أصحابي الورقة والقلم واحكي معاهم واعيط لحد ما أجيب أخري وبعد كده يرجع كل واحد لمكانه وارجع زي ما كنت مشحونة بطاقة جديدة وكأن شيئاً لم يكن ، وقتها اتأكدت ان القلم هو الصديق الحقيقي اللي هيفضل معايا طول عمري وهو سر السعادة والأمل بالنسبة لي وحاجات تانية كتير مش لازم أقولكو عليها دي بيني وبين قلّمي بقي وأنا قلّمي عمره ما طلع سر قلت له عليه فبالتالي مش هاجي أنا وأسيح لنفسي ...

و ده كان تعريف ع الماشي كده عني أما لو عاوز تعرفني أكثر هتلاقيني في كل سطر جوّه الكتاب اللي بيعبر عن كذا تجربة في بعض منهم تجربة شخصية كمواطن مصري أصلي شاهد علي كل ما يحدث في تلك البلد بجلوها اللي بنتمناه و مرها اللي بقينا متعايشين معاه ولو قل المرّ ده بنحس إن في حاجة غلط ومش بعيد نطالب بعودة المرّ اللي بقي بينا وبينه عشرة وده بالظبط هو صُلب الموضوع اللي بتكلم فيه جوّه الكتاب ده فهو عبارة عن مجموعة مقالات كتبت جزء منها من قبل ونُشر علي موقع الفضفضة الأول» فيس بوك

«حيث لم أجد وسيلة أخرى للتعبير عن تجاربي المصرية والتعبير عن تجربة الكتابة إلا فيه ، وبعد أن وجدت ترحاب من قرائي اللي هما أصدقائي وزملائي وأصحاب أصحابي ومعارفي قررت أوسع الدائرة شوية وأنشر المقالات في الكتاب ده وأضيف عليهم بعض المقالات الجديدة عشان يطلع الكتاب بالشكل ده

ممكن تقرأ الكتاب وتحس إن المواضيع كلها بتصب في مبدأ واحد وممكن تحس إن كل مقال هو عبارة عن حالة مستقلة بذاتها من اللقطات المصرية اللي بنعيشها كل يوم ، المهم إنك في الآخر هتلاقي الكتاب عبارة عن مصر تحت الميكروسكوب شوية لقطات مصرية عشتها وبنعيشها حبيت أعبر عنها وأوصل منها رسالة مباشرة وغير مباشرة فكل مقال أقصده وأقصد حالته المذكورة كما هي وأقصد كل موقف يشبهه وكل موقف تتخيله وأنت بتقرأ المقال ، فهو كتاب واقعي وخيالي في نفس الوقت حيث يعبر عن واقع نعيشه كل يوم لكن يمكنك استخدام خيالك واستخراج ما بين السطور من مواقف ورسائل أردت إيصالها ، لذا لن أطيل أكثر من ذلك وأترك الآن تغوص في أعماق السطور وما بين السطور ..

obeykendi.com



رسم عقده

طنط حشرية ... هي كائن هلامي لزج يعيش ويتعايش في المجتمعات الشرقية اللي زي مجتمعنا ، حد كده تلاقيه لازلك في كل تفاصيل حياتك وعاملك فيها بزم ومقطع السمكة وديلها ومحدش بي فهم أده وبيحاول يفرض ثقافته عليك في أي حاجة بتعملها ...

لو تخين هتكرهك في عيشتك وتحاول تقنعك تخس ولو رفيع هتحمسك انك شبح ولازم تتخن عشان تملأ مركزك كده بين الناس -قال يعني الوزن هو اللي هيديني قيمة- المهم انك لو فكرت تنفذ نصيحتها وتتخن او تخس حسب ظروفك برضه مش هيعجبها لازم ترمي مناخيرها في الموضوع ، أمال تعدي الموضوع بالساهل كده ! أبدا دي هتقنعك ان كده كويس مش محتاج تغير وزنك !

طب ومركزي ومشاعري وأحاسيسي اللي جرحتها أعمل فيهم ايه !!

عارف الناس اللي تجيلك وسط ما انت فرحان بانجاز عملته أو حام حقيقته وتقولك علي فكرة الطقم ده مش أد كده كنت لبست اللون الفحلقي كان هيبقي أشيك !!

عارف اللي يلاقيك محبوب بين الناس ويبجي يرزحك بؤين من بتوع حرااااا وراعي ربنا في تصرفاتك بلاش الأوفر اللي انت فيه ده

رسم عهد

النصيحة حلوة مفيش كلام بس حضرتك انصح وسيب ليا
الاختيار مش تفرض رأيك عليا بشتي الطرق وتنغص ليا حياتي لحد
ما انفذ الرأي ده

بس أنا بوجه رساله إلي كل طنط حشرية موجوده في حياتنا ..
تعيشي يا غالية و تقومي بواجبك وترخمي علينا كان وكان عارفة
ليه؟!

عشان في كل مرة بتقرري تحشري مناخيرك في تفاصيل حياتي
بتكشفي ليا عن جانب التحدي اللي جوايا
تعيشي وتحشري مناخيرك وأنا أعيش وأكتب عليك كان وكان ..

obeikandi.com



«العلم نور» و «العلم في الراس مش في الكراس» أشهر مثلين ممكن يتقالوا في مصر والمغزي منهم هو إن العلم مش بس اللي موجود في الكتب لكنه علم الحياة وكان معناهم إن الإنسان قبل ما يدخل في أي حاجة لازم يتعلم فقه الحاجة دي يعني لو هنتجوز لازم نتعلم فقه الزواج ، هنتغل نتعلم فقه الشغل ، هنعمل أي حاجة لازم نتعلم فقه الحاجة دي ، وفقه الشيء يعني العلم أو المعرفة اللي بتؤهلك للتعامل في الحاجة دي بطريقة صح و بدون وقوع في مشاكل ولا حتي معاصي ..

اللي فات ده هو الطبيعي اللي لازم يحصل ، بس احنا في مصر غير أي مكان تاني عندنا الكتالوج مختلف ، بمعنى أصح كل واحد ماشي بكتالوجه وعامل فيها رئيس جمهورية نفسه و ماشيين بالفهولة والأدهي من كده إننا مصدقين انه ده أقصر طريق للنجاح !

معظمنا بيدرس ويخرج علي سوق العمل عاوز يشتغل ويبقي وزير من أول يوم مش عاوز لا يتعب ولا يشقي ولا يؤهل نفسه حتي بدورات تدريبيه عشان يوصل للي هو عاوزه !

ميكروسكوب

معظمنا يدرس أصلا وهو مش فاهم اللي بيدرسه ومكمل في الدراسة - بس- عشان شكله ومظهره أو عشان ينجح ويخلص الجامعة ويشغل في أي حاجة تانية ! .. معظمنا بيدخل الجامعة أصلا بطريقة « حادي بادي » وقمة وقاع ولا كأنا بنعاين حوض سمك !

أقولكوا علي سر كلنا عارفينه ، إحنا كلنا تقريبا مش عارفين كيفية وحدود التعامل بين الولد والبنت وبتصرف بعشوائية مفرطة فإما تقف في أقصى اليمين ونبقي متشددين بدرجة تخرج اللي حوالينا أو نفتحها علي البحري بداعي الحرية والأخوة والذي منه ، بعك وزعلتكو مني مش كده؟!!

عارفين إحنا مشكلتنا إيه؟ إحنا كلنا حافظين إن العلم نور بس تقريبا محدش بينفذه وده يرجع لأن النور يقطع كثير في مصر وبالتالي العلم بينقطع معاه ، عشان كده محدش فينا يفكر في خطوة تعلم الحاجة اللي هو مقبل عليها مع إن العواقب بتبقي وخيمة أوي وفي الغالب يفشل أي مشروع أو فكرة قائمة علي الفهلوة حتي لو حقق مكسب قريب فالخسارة بعد كده بتكون فادحة وبنرجع نندم في وقت مينفعش فيه الندم !

رسم عقده

متيجو نحاول ولو مرة واحده في حياتنا نجرب نمشي صح ناخذ الطريق من أوله هנוصل أسرع وهنوصل صح كان يعني هنكسب ونريخ دماغنا من كلام الناس اللي مبيعجبناش ده ، تعالوا نجرب مرة كده ننفذ الآية الكريمة اللي بتقول « فاسألوا أهل الذكر إن كنتم لا تعلمون »

الفهولة مش أسلوب حياة ، الفهولة انحراف عن الحياة ...

obeykandil.com



بكل ثقة وثبات و بألوانها المبهجة المنتقاة بعناية فائقة جذبت الجميع حولها ، وقفوا منبهرين وراحوا يتهافتون عليها من كل حذب و صوب و كأنهم لم يروا لها مثيل من قبل ...

إنها زجاجة المُنظف التي التصقت بها أختها في «عرض النُص» ، و عرض النُص هو إنك تشتري المنتج وتأخذ عليه واحد تاني هدية ، وده أشهر عرض ممكن تشوفه في مصر وأكثر حاجة ممكن تخلينا نشترى المنتج سواء عاوزينه أو مش عاوزينه ، المهم إننا نلحق العرض اللي دائماً بيكون «لفترة محدوده» واللي كنت فاكراها زمان وأنا صغيرة شخصية كده زينا والمنتجات دي بتاعتها وهما بيبيعوها قبل ما ست « فترة محدوده » تيجي وتكوش علي الحاجات المعروضة !

كان هو ده تفسيري الوحيد للحدث نظراً للتهافت الشديد علي المنتج اللي مكتوب عليه الكلمة السحرية دي وده لأني كل ما سألت هو احنا محتاجين الحاجة دي حالياً عشان نشترىها بيبقي الرد إن اللي مش محتاجينه النهارده نحتاجه بكرة وإهه حاجة مش هتخسر، المهم إنني أشتري الحاجة بنُص التمن وأوفر ، طيب حضرتك بتستخدم المنتج ده أصلاً ، الرد بيكون لأ لسه هجرب أو مش دائماً بشتري

مبكر سكوب

النوع ده منه إنما برضه لازم ألحق العرض وأوَقّر! وهو ده مفهومنا عن التوفير في مصر إننا نشترى حاجات مش عاوزينها ومش بنستعملها بنصّ التمن عشان نوفر!

لا هو حضرتك مش هتوفر إلا لو اشتريت الحاجة اللي انت عاوزها بالكمية اللي محتاجها وبس إنما أشتري حاجة مليش فيها عشان عليها عرض ده اسمه تبذير مش توفير والفرق شاسع بين الإتين الحقيقة... وبنفس طريقة عرض النصّ بنشترى حاجات كتير ملهاش لزمة المهم إننا نلاقي مثير معين يخلينا نشترى حتى برضه لو احنا مش محتاجين الحاجة دي إنما غيرنا محتاجها واشتراها يبقى احنا كان لازم نشترىها هو احنا يعني أقل منه ولا إايه؟ وهيبقى شكلي إيه وسط أصحابي لما يبقى معاهم الحاجة دي وأنا لا والموضوع ده بنشوفه كتير في الموبايلات والآي باد وما شابه في مجتمعات الشباب، لازم كل شوية نغير الموبايل عشان نزل نوع أحدث وفيه أوبشنز جديده، يمكن يكون مليش في الأوبشنز واستخدامي للموبايل لا يتعدي المكالمات التليفونية بس، إنما عادي نتعلم ازاى نستعمل الأوبشنز مش هنغلب يعني، ومفهاش حاجة برضه لو أكسر اللاب توب عشان أجيب واحد أحدث حتى لو اللاب شغال زي الفل ومقضي الغرض مش مهم، المهم هو إني أجيب جديد وأواكب العصر فبالتالي بقي عادي

مبكر سكوب

لو عاوز تصيف مصيفك عندنا ويقعد يستعرض في الشاليهات و الفيلات ومناظر رهيبة جداً تخليك عاوز تشتري فوراً ولما تبص علي السعر تلاقي أسعار خيالية وأرقام كبيرة ميقدرش عليها غير طبقة معينة نسبتها محدوده جداً في مجتمعنا علي أساس إن خلاص كل الأساسيات موجوده وفاضل المصيف الفخم بتاعكوا !

اللي يغيظ في ده كله هو كلمة «بس» اللي بتتقال بعد السعر ! بس إيه انت بتقول سعر أكثر من نص الشعب اللي بيتفرج علي الإعلان ميقدرش عليه وتقول بس ! تحس إنه إعلان كل غرضه هو استفزاز المُشاهد، فإذا كان اللي فوق دي عروض توفير في ظاهرها فده بقي عرض تبذير رسمي و كل طبقة بقي وقدرتها علي التبذير في ناس بتبذر بعرض النُص وناس بتبذر بعرض المليون و نص ...

obeykandali.com



رسم عهد

لو سألتك انت مصري تقولي إيه ؟ قولي كل سنة وأنت طيب !!

كل سنة وأنت طيب جملة كده اتربيننا نقولها في المناسبات يعني في الأعياد الدينية ، الأعياد القومية ، أو حتي أعياد الميلاد ... ده اللي اتربيننا عليه، إنما احنا كالعاده بنتربي علي حمادة ونلاقي في الحياة حمادة تاني خالص ، يعني مثلاً الجملة دي المفروض - طبقاً للقاعدة اللي رسخوها في أذهاننا و احنا عيال - مبتتقالش إلا أيام معدودة في السنة ، و ده «المفروض» إنما بما إن «المفروض» عند المكوجي زي ما كلنا عارفين فحضرتك هتسمع الجملة دي ٣٦٥ يوم في السنة واحتمال أكثر لو عايز يعني الخير كثير ربنا يبارك ...

فاكر أول يوم في المدرسة وأنت عمّال تعيط ومش عاوز تدخل المدرسة ومامتك بتحايل فيك وبتنادي الدادة تاخذك تدخلك الفصل ؟ فاكر بقي الدادة قالت إيه للوالدة ؟ كل سنة وانت طيبة مش كده ؟ وأنت طبعاً من يومها كرهت الدادة دي لأنها شايفاك بتعيط وشايفه أسوأ يوم في حياتك وهي بتتكلم كأنه يوم عيد !!

شكلك مش فاكر اليوم ده ، طيب فاكر يوم تبيجتك في الابتدائية لما رحلت تجيبها من المدرسة وده طبعاً لو انت من جيلي اللي مكنش فيه مصدر تاني للنتيجة غير المدرسة لا نت بقي ولا غيره ، فاكر لما

ميكروسكوب

العاملين في المدرسة اتموا عليك ونفس ذات الجملة «كل سنة وانت طيب» وفين الحلاوة كانوا هما أبطال المشهد وده بيحصل قبل حتي ما تجيب النتيجة عشان يضمنوا إنك مش هتخلع منهم لو طلعت مش حلوة ..

سيبك بقي من ذكريات المدرسة والطفولة دي ، سبنا من «فاكر» ونقول «عارف» ، عارف لما تخرج مع أصحابك كده وتيجي تركز العربية ويطلع لك واحد ملوش أي وظيفة ولا بيعمل أي حاجة في الحياة غير انه يقف لك جنب الباب ومش هسيبك تنزل من غير الجملة إياها ، والجرسون اللي خلاك قاعد مع خطيبتك و بعد ما حاسبت ومستني الباقي يقولك نفس الجملة اللزجة، بتبقي في وسط هدومك وقتها ، هي الفكرة مش بُخل ، طيب يعني ليه عاملين ١٠٪ خدمة جزء أصلي من الفاتورة ومش بنقول حاجة ، ده حقكوارتضينا بيه ، لكن حق المواطن إنه يقرر يسبب لك الباقي ولا ياخده يديه لبواب العمارة اللي أول ما هيرّوح هيقوله برضه «كل سنة وانت طيب» مع أداء كده يحسسك انك راجع من البنك مش راجع من خروجه صرفت فيها دم قلبك !!

وكتير من المواقف دي ، سواق الميكروباص اللي غلّي الأجرة يوم الخميس بدون سبب والمبرر بتاعه «كل سنة وانت طيب» ، وعامل

رسم عهد

النضافة اللي مش بييجي يكنس الشارع وجايلك أول يوم عيد قال
بيعيد عليك وبرضه من غير ما يكنس هو مبيعرفش يكنس ، بيعرف
يعيد بس ، والممرض اللي مش بيدخل المرضي بالدور وبيدخلهم
بمزاجه وحسب ما تراضيه انت بقي ، والصناعي اللي مش هيخلص
لك حاجتك إلا لما يعدي عليك جملته الشهيرة ويا تلقطها انت وتقوم
معاه بالواجب يا يخلص لك حاجتك بمزاجه وفي الوقت اللي يناسبه
هو مش يناسبك انت ، والموظف اللي روتينه مش هيتكسر و ورقك
مش هيمشيه إلا لما ترش عليه رشتك الجريئة بعد ما هو يسمعك
جملته البريئة ...

وناس تانية كتير وكثير كلهم بيشتكوا من ظروف الحياة ومن غلهم
وفقرهم وظروف البلد وكلهم اتفقوا انهم ياخدوا حقهم من جيب و
جيبك وجيب أي حد يقع تحت ايدهم ، فاكرين انهم كده بيقبلوا
رزقهم ، لكن الحقيقة انهم بيقبلوا جيوبنا يعني بيسرقونا عيني عينك
كده ، ما هو انت لما تاخذ حاجة مش من حقك يبقي انت بتسرقني ،
ولما أنا أسكت علي سرتك بدعوي الخجل والإحراج أو إن سيادتك
بتاخذ الفلوس دي عنوة حتي مش بتدي لنا فرصه نعترض ، اعرف
وقتها إن ربنا مش هيبارك لك في الفلوس دي وهفضل برضه تشتكي
من الفقر والفلوس مش بتكفي وعمرها ما هتكفي الحقيقة لأن الطمع

مبكر سكوب

مبدأه «البحر يحب الزيادة» وعمرك ما هترضي لأنك ما تعرفش ان «القناعة كنز لا يفني»، صحيح الكلام ده شكله كده شعارات ومش بياكل عيش زي ما ناس كتير بتقول إنما هو مباديء عظيمة للي يفهمها ويحاول ينفذها مش يستسهل ويقرر يمد إيداه في جيوبنا ويبرر لنفسه إننا واكليها والعة!!

أنا نفسي أسأل سؤال لكل واحد ماشي بمبدأ كل سنة وانت طيب ده وبيقلب بيه رزقه، عرفت منين إن الناس اللي بتقلّبهم دول واكليها والعة زي ما بتقولوا، هو صحيح جازي يكون راكب عربية حلوة، أو لابس و متشيك علي الآخر و سهران في مطعم غالي، أو ساكن في عمارة حلوة في مكان راقى وغيره من المظاهر الجامده دي، لكن عمرك فكرت هو بيتعب أد إيه في الفلوس اللي جاب بيها الحاجات دي، عمرك فكرت اللي متشيك علي الآخر ده معاه فلوس فعلاً تتحمل رخامتك ورخامة ولزقة كل المستخدمين للمبدأ العظيم بتاعكو ده؟! أكيد محدش فيهم بيسأل الأسئلة دي أو بيسألوها بس بيسكتوا ضميرهم — كل سنة وانت طيب برضه ...

obeikandi.com



رسم عقده

حلاق الصحة من أشهر شخصيات التراث المصري العريق ، رجل كده كان موجود في المناطق الشعبية وعامل فيها وزير الصحة يعني أي حد يجراه حاجة في المنطقة تستدعي عناية طبية يجري هو بعدته ويروح يشوف شغله ، يعني حُقن يدي ، جروح يطهر ، حروق يعالج ، عمليات شغال برضه مفيش مانع ، وكله بالبركه كده وأنت وحظك بقي لو وقعت تحت ايده و يا صابت يا خابت ، المهم إن الرجل قايم بدوره والناس مقتنعة بيه وبمهاراته واخترعوا جنبه شوية خرافات كده ملهاش أساس ، يعني لو حد اتجرح ، بشوية بُن ونقله الجرح ، لو اتحرق نكسر له بيضه علي الحرق ده ، ده غير قصة قنديل أم هاشم الشهيرة والخرافة دي راح فيها عيون ناس كثير و فقدوا بصرهم ومع ذلك فضلوا مقتنعين بالخرافة دي ومصديقينها ومستمرين فيها كانوا يمرور الزمن كل حاجة بتطور ، فاخترني حلاق الصحة لكن فضل أثره موجود في كل بيت متمثل في مصطلح « الطب الشعبي » اللي مش عارفين له أي أساس غير انه مجموعة خرافات بيتوارثها الناس جيل بعد جيل وكل جيل بقي بياخد من اللي قبله ويطور ، ما هو كل واحد لازم يحط التاتش بتاعه عشان نواكب العصر برضه أمال هفضل واقفين محلّك سر كده مش معقول يعني !!

ومن ضمن خرافات الطب الشعبي « اسأل مجرب ولا تسأل دكتور

« وده بيظهر جدا في علم النسا والولاده ، وشغل العيل ينزل من هنا ونحط مكانه فرخه ولازم تولدي في البيت أصل ممكن ابنك يتلخبط مع طفل تاني في المستشفى وغيرها كتير من الخرافات تحت رعاية الجملة الشهيرة لكريمة مختار في فيلم الحفيد » هو الدكتور كان حمل ولا ولد قدي ، اسمعي مني أنا أمك وعارفة مصلحتك كويس « و كأن الدكتور ده موجود في الدنيا عشان نعتمد علي التجارب الشخصية مش علي العلم وتعلياته، ده غير كتير من النصائح والارشادات الشعبيه اللي ممكن تودّي في داهية فعلاً وممكن نعرض بيها حياة ناس كتير للخطر... يعني مثلاً استحالة تلاقي واحد مصدّع إلا وهتلاقي معظم اللي حواليه بيعرضوا المساعدة وكل واحد طلّع من شنته دوا للصداع وخصوصاً البنات متخصصين أوي في الحاجات دي، تحس كل واحده منهم ماشية بصيدلية في شنتها متعرفش بقي اسم الدوا ده إيه ولا بتاع إيه أساساً، أنت هتلاقي الواحد منهم طلعت قرص كده وبتقولك ده جامد جداً لحالتك أنا مجرّبه، الغريب إن الناس بتاخذ العلاج ده وبعدين تسأل علي اسمه وتبدأ بقي تسأل متأكد إنه هيجيب فايده، يعني انت مجرّبه قبل كده، وعلي ضمانتك ، طب يعني علي ضمانتي وبعدين لو جراك حاجة نتيجة العلاج ده هتعمل إيه بقي، هاجي أضمن لك المرض ببطاقتي وأدفع له كفالة و أخرجته من جسمك مثلاً !!

رسم عقده

الأمثلة كثير جداً في الموضوع ده ولو فتحنا فيها مش هنخلص
عشان احنا أساساً نموت في الحرافات ونقدسها إنما بقي تقولي علم
واسأل دكتور دي حاجة عيب ويقولوا عليّا توتو كده والناس تتريق
عليّا وتضيع هييتي قدامهم ، والجمله دي قالها نقّاش كان شغال عندنا
وفي وسط الشغل اتجرح ولما جبنا له لزق جروح ومرهم وكلام من ده
قعد يضحك ومرضاش أبداً وقال لا طبعباً لو حد عرف من زمائلي
هيمسكها لي ويقول عليا مش رجل ، احنا لما حد فينا يتجرح نخط
له علي الجرح شوية جبس كده يلم علي طول وأهه ربك بيستر ولو
مخفتش أهه أنا كده كده صنايعي مش لازم أبقي صاغ سليم يعني !!

صحيح ربك بيستر وصحيح بتعدّي كثير علي خير إنما برضه
منكرش إن اللي بنعمله ده كارثة ولما يقف فوراً ونتعلم نمشي بمبدأ
« ادي العيش لخبّازه » خصوصاً في الحاجات اللي تتعلق بأرواح
الناس

خليها مبدأ في حياتك «صحتك أمانة و لازم تحافظ عليها» ..

خلص الكلام ..

obeykandil.com



رسم محمد

المثل يقول «افتي يا ابن آدم فتي الوحوش ، لو حد سألك
متخذلهوش !!»

غريب مش كده ! أنا كان استغربت بس لقيتنا ماشيين كلنا
أو معظمنا يعني بالمثل وبنطبقه بكل ما أوتينا من قوة وتلقائي كده ،
تحسه مثل مطبوع علي جيناتنا الوراثية وبينتقل من جيل لجيل بكل
سلاسة من غير ما يتعرض لطفرة جينية حتي في أي جيل !

وده اللي محيرني جداً اشعني ده بالذات اللي مبيتأثرش
بعوامل التعرية ، بس خفت أسأل السؤال ده لأنه أكيد هتعرض
للفتي الأذلي اللي احنا شغالين بيه عملاً بالمبدأ المذكور أعلاه ولأني كان
كل ما اتكلم مع حد في الموضوع يقنعي إننا مش فتاين ولا حاجة
وإن اللي احنا بنعمله بيبقي من دواع الجدعنه والشهامة والكلام
اللذيد ده ، وده اللي خلاني في يوم قررت إنني أجرب المثل ده والحقيقة
أنا جربته مضطر مش بشوقي يعني ، بس في اليوم ده غيرت فكري
جامد عننا وعن المثل ده تماماً لأن اللي حصل كان حاجة تستحق
التغيير ، تغيير فكري يعني !

ذات مرة كده خير اللهم اجعله خير كنت رايحه مستشفى
«صدر العباسية» ، أيون هكي بالتفاصيل عشان نفهم بعض ، كل

قلت أسأل ، وسبحان الله لقيت مصر كلها بترد في نفس النفس ، قلت يبقي كلامهم صح و وصلت في النهاية لميدان العباسية «تقريبا يعني» المهم أنا في الميدان ده معرفش أي حاجة ومش عارفة اعمل إيه من هناك ويا دوب لفيت لفه كده حوالين نفسي وفجأة لقيت الشارع كله شكل واحد مش فاكرة بقي أنا كنت جاية من هنا ولا من الناحية الثانية ، وقعدت أدور بقي ، يا جماعه محدش شافني وأنا بلف من شوية بدأت اللفه منين عشان أعرف أنا همشي ازاى ! وأنا كل ما أسأل يقولولي «قالك فين» وهو أنا يعني لو كنت أعرف ولا كان حد قالي فين كنت سألت حضرتك يا عمو؟! وطبعاً عمو قرر ميخلش بمعلوماته عليا وكل اللي قاله «بصي يا بنتي انت هتمشي علي طوووول هتلاقيها في وشك» ، والحقيقة علي طول كانت وصفتة مشتركة بين كل اللي سألتهم وفضلت أمشي ولا الشارع عاوز يخلص ولا المستشفى بتظهر وبالصدفه بسأل واحده عن الطريق وحكيت لها اللي حصل و وصفهم ليا ، اتخضت جدا و صرخت في وشي « حرام عليهم يا بنتي دي بعيده عن هنا اركبي مواصلة» ، وعلي الرغم إنها هي الوحيدة اللي كانت صادقه في كلامها ولم تُفِت أي فتوي علي الاطلاق إلا إني في اللحظة دي بالذات قررت إني مش هسمع كلام حد وقلت أنا هتصرف وركبت تاكسي ، وجوه التاكسي اكتشفت إن مصر كلها كدابين ، حيث ان الطريق مش قريب أصلا ، ثانيا الطريق مش

ميكروسكوب

مستقيم يعني مش علي طووووول زي ما قالوا ومينفعش يتمشي أصلاً ، بس طنط الوحيد اللي كانت صادقه وده اكد لي مبدأ « الستات ميعرفوش يكذبوا » أبداً أبداً ..

في النهاية بقي رسالة لكل مواطن مصري في الشارع ، ارحمنا من الفتى ، لو قلت معرفش مش عيب علي فكرة بالعكس هتوفر وقتك ومجهودك و تكسب فيا ثواب انك سبتني اسأل حد يعرف وهتوفر علي نفسك دعوة» ولية ساعة عصرية» كده من قهرتها باللي عملتوا فيها ، أيها المواطن أرجوك أرجوك متفتيش ..

obeykandi.com



رسم عهد

طز في اللي عمره في يوم ما عاش وما خرجنا عشانه وعشانا قال

متمثلوناش

طز في اللي احتجته يوم قفل موبايله ولا حتي جاش

طز في اللي يوم جرحنا وحتى آسف ما اتقالتش

طز في اللي هيمتحنا وقال علينا فشلة وش

طز في اللي قتل طموحنا وقال كلام ميستاهاش

طز في اللي عاملي رجل والرجوله عنده شنب في وش

طز في اللي افقد عيلتنا فرد باهماله وما اتحاسبش

طز في اللي آذاك في يوم ومن أدبك مردتش

طز في اللي عمل مصيبة وفي كرسي أبوه استخبي وما اتحاسبش

طز في اللي عطل المسيرة وطلع له كل يوم بسيرة طز وش

طز في القانون اللي يمشي ع الغلبان وبس طز وش

طز في اللي اشتكيت له إني اتسرقت قام عملي قوام ضريبة و

مبكر سكوب

نفذها وش

طر في اللي اتفلسف عليك و قتل عزميتك وطلع حمار طز وش

طر في اللي ع الناصية عاكس بنت جارتة ولا اتكسفش

طر في اللي عاملي فيها طنط حشرية ولازقلي في تفاصيل حياتي

طر وش

طر في اللي بيعامل انسان مريض كأنه نكرة وسابه في الطريقة

وقاله تدفع قوام تخش

طر مش قصيدة لكن قهرة من حالنا اللي بقا شبه الكاوتش

obeykandl.com



رسم عهد

فراخ تركي ! احنا طول عمرنا نسمع عن نوعين من الفراخ يا بلدي
يا فراخ بيضا لكن فراخ تركي؟! ده الجديد بقى .. هحكيلكو الحكاية
... ونقول من البداية ..

ذات مرة كده صحيت من النوم وقلت أقلب في التلفزيون
اتتقف يعني وأشوف فكر الناس رايح فين ، واستوقفني برنامج كانوا
بيتكلموا فيه عن غزو المسلسلات التركي لمصر وازاي بينقلو لنا ثقافة
لا تتماشي معنا وازاي الدبلجة تبقي سوري والجلالة أخذت واحد
من الضيوف اللي هو في الأصل ممثل مصري ، وقعدوا يسترسلوا في
الموضوع واحنا بنفقد الهوية المصرية والكلام الكبير اللي بنسمعه في
المناسبات ده وإذ فجأة ألقى الممثل اللي انفعل أوي ده بيقول جملة
مرتعشة كده وكأنه بيستعطف الجمهور« احنا مش عارفين نشتغل
بسببهم» هنا بقى كانت الصدمة ...

قول كده بقى القصة مش قصة ثقافة وهوية والعروبة اللي كانت
قاتلاك من شوية !!

في نفس اليوم وعلي الغدا بقى لقيت الحاجة عاملة لنا فراخ
شكلها غريب شوية .. سألتها قالتلي دي فراخ تركي !! ده علي أساس
إن «حريم السلطان» معزومين علي الغدا عندنا ولا إيه ! و عملت

مبكر سكوب

ثورة شبه اللي اتفرجت عليها الصبح وخذتني الجلالة أنا كان والهوية المصرية ضاااعت حتي في الأكل وده طبعاً مش لأنني مبحبش التغيير في الأكل اطلاقاً لاده عزازاً بعروبتى وبهويتنا المصرية أكيد

وبنفس الطريقة ماشيين كلنا في مصر لو لقيت واحد طالع في التلفزيون وعمال يتكلم عن المبادئ وعن الشعب الأصيل اللي عنده حرية رأي وتعبير ومحدث وصي علي الشعب ده يبقى حاجة من اتنين يا عاوز يقلب الشعب علي الحكومة يا إما الانتخابات قربت

لما تلاقي حد داخل عليك عمال يشكر في المهنة وازاي احنا لينا دور جامد أو ووي وبيشكر فيك انت شخصياً كدكتور اعرف إنه عاوزك تعالج له حد..لما تلاقي حد من اصحابك بيتكلم عن الإسراف ورسم لك دور الواعظ ولازم نتدبر أمورنا وهنتحاسب علي كل اللي بنعمله اعرف إنه مقشفر اليومين دول بس مخرج يقول

لما تركب تاكسي وتلاقي السواق بيشكيلك همه من يوم ما اتولد في الدنيا لحد ما انت اتجننت في عقلك وركبت معاه اعرف انه مش هيدريك باقي الفلوس واحتمال ميشغلش العداد أصلاً ما هو العداد بايظ بقي والنحس راكبه و مش لاقى ياكل والبت بطة عاوزة فلوس الدرس والواد حماسة عاوز يجيب كتب المدرسة

رسم محمد

حتى في الكلية لما تلاقي حد فجأة ضارب معاك صحوية مفاجأة
والحنية واخذاه والجلالة كان واخذاه وعمال يحكي لك عن انجازاته
العظيمة ومواقفه المغوارة وناقص يطلع لك سيفين من جيبه ويقولك
كل واحد اتكسر منه في معركة مع صلاح الدين الايوبي اعرف إن
انتخابات الاتحاد قربت

المتشابه في كل اللي القصص دي هو إننا بنتكلم صح بس بطريقة
غلط يعني سيادتك بتقولي مبدأ عظيم -بس- عشان توصل بيه لغرض
أبدا مش عظيم وده في حد ذاته نفاق ; «فأية المنافق ثلاث إذا حدث
كذب وإذا وعد اخلف وإذا ائتمن خان» خليك فاكر الحديث ده
كويس أوي عشان هيرن في ودانك اليومين دول مع كتر الكلام عن
الإيد الواحده وكلنا واحد وكلنا فدا مصر وشوية الفراخ التركي اللي
حكينا عليهم دول هيطلعوا

بلاش نلوث المبادئ باستخدامها لأغراض شخصية فالمبادئ
مش محتاجة مبرر ولا محتاجة حد يبجي يقول علي فكرة أنا في
خدمتك علي فكرة أنا تمام ..

لو انت تمام وفي خدمتي صحيح همس بده من غير ما تقول ولو
محستش يبقي انت مقصر

obeykandl.com



- أم سيد جت ؟

- آه جت

- أطلع لها بقي عشان أوريها شغلها الست دي اللي مبتجيش

غير بالعين الحمرا !!

أم سيد مين ؟

دي العاملة اللي بتيجي تمسح السلم عندنا في العمارة إنما إيه كل السكان بتعاملها بذوق واحترام ورحمة ، وحت خمسين خط تحت كلمة رحمة دي ..

أم سيد دي بقي حكاية كبيرة مش أي كلام ، والحكاية دي بدأت من كام سنة كده لما اتفقوا معاها تيجي تمسح السلم مرة كل أسبوع وكل اللي علينا هو إننا نوفر لها أدوات النظافة وكل شقة تديها المية و تحاسبها بمبلغ متفق عليه ، لحد كده حلو الكلام ؟ ، افكر إنه حلو الكلام وجميل جداً واتفاق مُرضي لجميع الأطراف ، وده كان عقد العمل اللي بينا، هو عقد شفوي صحيح إنما الكل فاهم ومتفق ضمناً إنه عقد لا بد للجميع من الالتزام بيه ..

والتزمنا بيه ؟

ميكروسكوب

أول كام شهر الطرفين التزموا بالعقد وبعد كده قطعنا العقد وطلقناه بالتلاتة وكل واحد عمل عقد علي مزاجه وده اللي سبب كل المشاكل اللي حصلت بعد كده واللي أدت إن في النهاية تم طرد أم سيد من البيت وفضلنا من غير عامل ينضف السلم حتي الآن ..

في الحقيقة أم سيد مكنتش بتلتزم بالمعاد الأسبوعي المتفق عليه وبالتالي لما كانت بتيجي كانت ممكن تلاقي نُص السكان مش موجودين عشان يدوها مية تمسح أو يدوها أجرتها حتي واللي كان بيقتي موجود كان لازم يديها كلمتين في جنبها عشان تتعدل وتمشي علي العجين متلخبطوش !!

و حجة أم سيد دائماً كانت جاهزة واللي كانت حاجة من اتنين يا إما بنتها كانت تعبانة ومقدرتش تسيبها يا إما حماها ماتت ومكنتش ينفع تيجي ، كل ما تتزق تقول حجة من الاتنين دول ، مش قادرة أفكر إحنا عزيناها في حماها دي كام مرة من كترهم !

الفكرة مش إنها تغيب عشان بنتها أو حماها و اللي كنا بنعذرهما عليهم رغم تشككنا في صحة كلامها، لكن الفكرة هي إنك تكتشف إنها كانت بتغيب عشان بتقلب رزقها في أماكن تانية وتجيلنا وقت ما تفضي ، علي أساس إن الشغل عندنا ثابت فمهما راحت مسيرها

رسم عقد

هتيجي وهتلاقينا مستنينها وكانت بتستغل النقطة دي أوي ، وإن محدش في العمارة بي فكر يدور علي عامل مكانها مهما عملت وكله بيتواكل علي الثاني وبالتالي هي ضامنة الشغل في المكان مهما عملت فلوش لزوم الالتزام بالعقد المُبرم بينا طالما الحياة ماشية زي الفل و المكان مضمون وبالتالي عادي لو خدت لها كلمتين ملهومش لزمة من أي حد ، هتتضايق شوية أو هتعمل سمعها ثقيل وهيعدي الموقف ويعدي الأسبوع و الثاني وفجأة يتكرر نفس الموضوع بنفس الحجج ونفس ردود الفعل !

صحيح أم سيد غلبتنا كثير في شغلها وكانت بتحط الواحد كثير في مواقف محرجة لما يبقى جاي له ضيوف والسلم مش نضيف عشان هي قررت متجيش الاسبوع ده من غير ما تبلغ حد ، فكنا بنضطر نسمح السلم بنفسنا في اللحظة الاخيرة أو نسيبه ونحكي للضيوف قصة أم سيد في الزيارة عشان نبرر موقفنا ..

بس برضه احنا كسكان في مننا كثير كان بيفتري عليها بداع السيطرة و التعالي وغيرها كثير من المفردات المعروفة في التعامل مع أي عامل ، علي اعتبار انه من ضمن الاتفاق الضمني كان في اتفاق علي إهدار كرامة العامل ده في أي لحظة وحسب مزاج صاحب العمل اللي هو احنا كسكان ، ومفيش مشكلة لما عيل من ولاد

العمارة يضايقها بكلمة تخرجها أو تجرح كرامتها فتلاقي أهله خارجين لها مشمرين وناويين علي خناقة عشان هي ردت عليه !

طبعا ازاى هي ترد عليه وتبقي مين عشان ترد عليه ، دي حته عاملة عندهم ولازم تعتذر وتبدي فروض الولاء والطاعة وفوق كل ده لازم ترضي وهي مغلوط فيها إن اللي غلط ينزل فيها تهزيق هو كان ، اشمعني هو يعني ماهو أوكازيون خناق واتفتح والكل لازم يلحق فرصته قبل ما العرض يخلص ، العرض اللي انتهى بطرد «أم سيد» ، اتطردت وصدر فرمان بمنعها منع نهائي من دخول العمارة عشان ردت علي واحد غلط فيها ، عشان افتكرت إنها انسانة واتوجعت من كلمة أسيادها وكأننا فاهمين حديث « أعط الأجير حقه قبل أن يجف عرقه » ، هو إننا ندي له حقه في الشتيمة والتهزيق مش حقه في الفلوس !!

مشيت أم سيد و فضل السلام مش نضيف فترة طويلة والكل مكابر إنه يخرج من شقته وينضفه لحد ما بقي منظره لا يُحتمل ، فاضطر الكل أسفين يتعاونوا لأول مرة في حياتهم و ينضفوه بنفسهم وكل واحد كاتم جواه جملة باينة في عيونهم « إحنا أسفين يا أم سيد»

رسم عقد

وفضلت أم سيد بتحاول محاولات مستميتة إنها ترجع و باءت كل المحاولات بالفشل من باب الأنا العالية عند البعض والعند و التطبيل للأصحاب عند البعض الآخر ، لكن جدير بالذكر هو الجملة اللي كانت باينة من بين سطور كلامها « يا ريتني التزمت بالعقد اللي بينا» والجملة اللي ممكن تخليك تبكي رغم انك مسمعتهاش لكن هتحسها في كلامها هي « يا ريتني ما كنت افكرت إني انسانة في اللحظة دي وكنت قبلت بالإهانة عشان أعيش ما هو كده إهانة وكده إهانة المهم نعيش» ..

obeikandi.com



رسم عقده

البُعبُع هو تلك الشخصية الوهمية اللي بيفضلو يخوفوا الأطفال بيها وهما صغيرين عشان يرتاحوا من زئهم في حاجة معينة ولما بيكبروا بقا وتفضل الفكرة دي معاهم بيفضلوا يقنعوهم إن البُعبُع أصلاً مش موجود !!

لكن ساعات بيقتي الإقناع صعب لأن إيمان الطفل بوجود الشخصية دي بيكون أكبر من أي وسيلة إقناع

وبنفس الطريقة ماشيين في بلدنا بِنهَج الرجل البُعبُع يعني مثلاً عندك الشرطة فضلنا سنين كتيير بنخاف منهم وبنعمل لهم ألف حساب ولما يعدي واحد منهم يتضرب له تعظيم سلام ويبقي باشا ، واتولد جوانا قناعة إن الشرطة دي عندها قوة لا تُقهر وده اللي كان بيسكّت الناس ومخوفهم من إبداء رأيهم وغضبهم فعشنا سنين طوال مش جنب الحيط بقي لا إحنا كنا عايشين جوه الحيط نفسه وده لإيماننا طول الوقت بإن «الحيطان لها ودان» ..

وفجأة لما حاول بعض الناس مننا يشيلو من جواهرهم الإيمان بوجود ذاك البُعبُع انتصروا عليه وانهار البُعبُع سريعاً ولم يعد لتلك الفزاعة وجود وبقينا بدل ما كنا بنحفر الحيطه ونمشي جواها خوفاً من مقابلة أحد الفزاعات بالمصادفة فنلتي ما كان يجول بمخيلتنا من ألوان المهانة

ميكروسكوب

أصبحنا بعد الثورة بنقول ..

فينك يا شرطة مدوخانا

أنت مع الكرسي ولا معانا

حيث انهار البُعبُع وفهمنا إن قوته دي مجرد وهم يظهر دفاعاً عن

النظام الحاكم مش عن الشعب

خلاصة الكلام إن البُعبُع انهار ومبقاش حد بيخاف منه لما شيلنا

من جوانا فكرة وجوده عاوزين بقي حد يحط جوه البُعبُع ده الإيمان

بفكرة إن وجوده أصلاً هدفه هو حماية المواطنين مش أي حد تاني

، أعتقد الإيمان بالفكرة هيكون تأثيره أقوى من تغيير يافطة الشرطة

في خدمة الشعب ولا في خدمة الوطن لأن احنا الشعب وبنكون

الوطن وبما إن الإيمان بالفكرة أثبت إنه أقوى من الزن علي الودان

اللي المفروض إنه أمرّ من السحر فلازم إحنا كان نؤمن بأفكارنا أكثر

و نؤمن بامكانياتنا أكثر وأكثر ، كل واحد يتحرك يشوف إمكانياته

وقدراته والحاجة اللي بيحبها وممكن يحقق نفسه فيها ويشغل علي

نفسه صح بإنه ينفض للبُعبُع اللي جواه وبيخوفه من الفشل ويرزع

مكانه الإيمان بذاته .. فلنؤمن بذاتنا وليذهب البُعبُع إلي الجحيم ..

o b e i k a n d i . c o m



رسم عهد

(تف علي عمو يا حبيبي) من أشهر الجمل اللي بتنتقال في البيوت المصرية لأي طفل صغير لسه بيتعلم الكلام ، وأول ما ينطق نخليه يشتم عمو علي طول وكان سنتين كده ولا حاجة نبدأ نضرب الولد ده لو اتكلم بطريقة وحشة مع أهله أو مع حد غريب !!

تركيبة غريبة مش كده؟! في الحقيقة هي أغرب تركيبة ممكن تشوفها علي وجه الأرض تحس كده إن اللي بيربوا عيالهم بالطريقة دي عندهم انفصام في الشخصية يعني أول ما العيل يبدأ يتكلم يعاومه كلام ميتقالش أصلاً وتصرفات متصحش وكل ما يعمل كده يقعوا من الضحك ، مع إني مش قادرة أفهم إيه المضحك في إن عيل صغير يتف علي عمو وإيه ذنب عمو أصلاً إن له أخ اتهيل أول ما خلف عيل عشان يخليه يتف عليه؟! وإيه المضحك في إن عيل صغير يقول لفظ مش محترم أو يكلم حد بطريقة مش كويسة كده زي ما كتير مننا بيعلم ولاده !

أسئلة كتير بتدور في دماغنا حوالين الموضوع ده ومش لاقية لها إجابة خصوصاً إننا مجتمع بيحب يعيش دور الفضيلة والتدين و بنحب التشدد بكلمة (إحنا شعب متدين) !!

متدين بقي من أي ناحية؟ وهل التدين بيخلينا نربي ولادنا علي

ميكروسكوب

قلة الأدب ونزاع فيهم أخلاق وتصرفات فاسدة إحنا نفسنا بنعيب
علي الكبار لما يعملوها؟!!

نفسى حد يفهمني ويقولى سبب مقنع للحاجات دي ، وليه لما
بيكبر الطفل ده ويستمر في الأخلاق اللي احنا زرناها فيه بنفسنا
بنعاقبه عليها !! مع إن احنا اللي رمينا البذرة الفاسده دي ، الطفل
طلع في الدنيا ميعرفش غير أبوه وأمه لقاها بيقولو له «تف علي عمو»
وكل ما يعمل كده يضحكوا وكل ما يكررها يزيدوا في الضحك وكل
ما يبتكر حاجة شبه العملة السودا دي يضحكوا أكثر وأكثر وكل ما
ضيف يجيلهم يفرجوه علي الأراجوز اللي خلفوه ويتباهوا بسوء أخلاق
الصغير اللي ملوش ذنب في حاجة بيتعلمها من مصدره الأساسي
للتعلم في السن ده ..

بجد بيصعب عليا الطفل لما يكبر ويتعاقب عقاب شديد علي
لفظ قاله أو حركة عملها كانت لسه من سنة حلوة وبتضحك وبنقلوه
يكررها ، خلاص الإحترام قاتلك أوي دلوقتي ومستغرب من عمائل
ابنك !

بحس الطفل بيتزرع جواه حاجات أسوأ بكثير من اللي بيتعاقب
عليها ، بحس إنه بيتزرع جواه انعدام ثقة في كلام الأهل يعني إزاي

رسم عقل

يعلموني حاجة وبعدين يحاسبوني عليها ، طيب ليه ما يحاسبوش نفسهم مش هما السبب في الموضوع من الأول ، يبقى هما اللي يتحاسبوا! ، وبالتالي بينشأ الطفل ده مش متقبل أوي نصيحة الأبوين وبيحاول يدور علي مصدر تاني لمعلوماته ، أي مصدر بقي صح ولا غلط مش هتفرق المهم إنه يكون مصدر معندوش شيزوفرينيا زي أبويه !!

لو دورنا في عواقب الموضوع ده هنلاقيه حاجات كتير سلبيه بتنتج عن البذرة الفاسدة دي وهنلاقي إننا بنربي جيل شبه فاسد ده لو محدش لحقه في المدرسة بقي وعلمه الأخلاق السليمة بطريقة صح ..

كل ما أفكر في الموضوع ده بفتكر برنامج شفته عن اليابان و المذيع يبسأل فيه طفل صغير ليه مش بترمي زباله علي الأرض مع إن مفيش ولا سلة موجوده في الشارع ، فرد عليه الطفل وقاله إن كل واحد فينا مسئول عن زبالته وقعد يشرح له بقي إنه لو رمينا علي الأرض هيحصل إحتباس حراري ازاي وشوية كلام كده بهرني الحقيقة ، كلام يعرفك الفرق بين تربيتهم لأولادهم وتربيتنا للتفانين علي أعمامهم ، هناك يوجد إسلام بلا مسلمين وعندنا يوجد مسلمين بلا إسلام ، مش بعصم بس اللي بتكلم فيه ده شريحة كبيرة وموجوده بقوة في مجتمعنا

مبكر سكوب

معتقدش أبداً إننا ننقص حاجة عن اليابانيين اللي ربوا أولادهم
بيقوا زي الطفل اللي كل ما افتكر كلامه بنهر ، بالعكس إحنا عندنا
دين عظيم بيعلمنا كل حاجة جميلة بس لو احنا رجعنا له وركزنا في
أخلاقه وحاولنا نتعلمها ونربي أولادنا عليها بدل ما احنا عمالين نتشدد
بالدين هنا وهناك ونفتي في الرايحة والحجاية ونضيق علي الناس في أمور
دينهم وسايين الأساسيات اللي من غيرها يبقي حالنا زي ما احنا
عايشين كده بالظبط ..

أصلح طفل تصلح أمة ...

obeykandi.com



رسم محمد

في المترو، في الزحمة والحر وفي وقت مفهوش موضع لقدم في العربية ، وقف المترو وفتح بابه وركبت واحده ومعها صندوق كده قال وبتديهولي أحطه علي الرف فوق عشان مفيش مكان ، يا دوب أخذته بحسن نية ولسه بحركه سمعت صوت «هوهو» ! الصوت جاي منين ؟

أنا شاكة في حاجة ويا رب أكون غلطانة ، وببص وبراءة الأطفال في عينيا لقيت الصندوق فيه كلب !! وأنا بترعب من الكلاب جداً والموضوع واصل معايا لدرجة الفوييا ، فرميت الصندوق عليها وقلت لها مش تقولي إنه كلب وبحاول أهرب من الوحش المفترس اللي مستخبي جوه القفص قال وييهوهو كان بكل بجاجة ! لقيتها بتبص لي باستغراب وبتقولي ده كلب!

يا سلام ياختي ما أنا شايفة وسامعه إنه كلب حد قالك إني فاكراه خفّاش مثلاً ، كلب وبخاف من الكلاب !

قالت لي لا ده حزومبل !؟

لا يا شيخه معرفتوش أنا كده علي أساس إن حزومبل ده الإسم ولا النوع ؟ قالت لي كلب بس كيوت خالص ، شايفة عينيه ، شايفه رفته ، وبتفتح القفص وهتوريني نعوميته

قتلتها شايفة الباب ؟

قالت لي آه، قتلتها ابعدني قفصك عن اتجاهه عشان ههرب منه !! ونزلت يومها هروباً من هوهوة سي حزومبل وهرباً من أغنية « الحلوة لسه صغيره وبتخاف من الكلاب الصغيره » ده اللي كان ناقص يتقال ماهي ظاقت بقي .. في نفس ذات اليوم دخلت العمارة عندنا لقيت قطة نائمة علي أول سلمة وواخده راحتها أوي !

بصيت لها كده وقلت هو اليوم باين من أوله وحاولت كل محاولاتي إني أصحياها عشان تبعد عن السلم وطبعاً كلها محاولات من بعيد لبعيد وكلها بائت بالفشل لحد ما أنا اللي سبت لها البيت وقعدت ألف في الشارع لعل وعسي أرجع الأقيها صحيت أو أي حد مشاها ، ورجعت ولسه داخلة لقيتها بتجري من حد و نطت في وشي ! ، بلاش بقي أحكيلكوا علي ردة فعلي عشان الإحراج بقي وكده ، إنما اللي فرسني في الموضوع هو إن جارتنا قالت لي بكل برود ، مالك دي قطة !

برضه ! يا جماعة هو حد قالكو إني ساقطة كي جي وان ومعرفش أسماء الحيوانات ! ما أنا عارفة إنها قطة مش حيوان السنونو يعني ، قطة وبخاف من القطط ، قطة وبخاف من القطط ، أنا بخااااااف من القطط مش حاجة تستدعي الاستغراب ، صحيح أنا سني كبير علي

رسم عقده

الخوف من القوط والكلام ده ، بس هنعمل إيه حكمة ربنا بقي إني
يبقي عندي فوبيا هنعترض بقي علي حكمة ربنا كان !

انتهي الموقف ودخلت بيتنا بسلام وبالليل بقي بتفرج بالصدفة
علي التلفزيون لقيت إعلان سخيف جداً هو بيعبر عن مأساتي
بالظبط جايبين اتنين رجال بيتفرجوا علي التلفزيون وفجأة واحد
منهم يخوف الثاني بقطة و واضح إن أحننا بيتربع زي حالاتي ،
الأسخف بقي في الموضوع إنه واحد جه مسكه من ورا عشان حتي
ميعرفش يجري ، مش كفاية عليه الشخصية اللزجة اللي ماسك له
القطة و حاطها في وشه ، لأ لازم يبجي شخصية أكثر لزوجه عشان
يكمل المشهد السخيف اللي بيصيني برعب كل ما أشوفه و بتخيل
نفسى مكان الرجل ده ، بحس كأن حد حبسني في مقبرة ...

اللي حصل ده خلاّني يومها أقعد أفكر، طبعاً بعيداً عن حالة
النحس اللي خلّنتي أقابل كل ده في يوم واحد ، فكرت هو احنا ليه
بنتعامل مع الإنسان اللي عنده فوبيا أو بيخاف «بالبلدي» بمنتهي
السخافة والإستهتار ، دي حاجة مش بإيده خالص وبتأثر فيه نفسياً
لما حد يكتشف الموضوع وخصوصاً لما حد يقعد يتريق أو يتعمد يحطه
في موقف يعرضه لأعراض الفوبيا دي ، إيه المضحك يعني إنك
تعرف إن حد معين بيخاف من حاجة قطة بقي ولا كلب أو غيره؟!!

كلها حاجات عادية بالنسبة لك ومتعايش معاها بكل سلمية وانبساط
إنما بالنسبale الموضوع مختلف تماماً ، ومعتقدش إن شكل النبي آدم
بيبقي مُضحك وهو مرعوب ومش عارف يتصرف ومعتقدش برضه
إن كلامك بيبقي مُقنع وإنّ عامل فيها دكتور نفسي وعمّال تقنعه
إن الحاجة دي مش بتخوّف وتقربها منه عافية أو تحدفها عليه
أو تعرضه للحاجة اللي بتخوفه بأي شكل كان ، أصلاً الإنسان في
اللحظة دي وعن تجربة مش بيبقي مركز في نصايحك وانت متقمص
شخصية الدكتور النفسي أد ما بيبقي مركز هيهرب إزاي من الموقف أو
إزاي يقضي عليك أنت شخصياً عشان توقف الحوار السخيف ده !!
بلاش نستهر بمشاعر الناس و مخاوفهم ده حتي ديننا بينهانا عن إخافة
البشر أو إثارة الرعب في أي مكان وأعتقد مفيش دين يُبيح لأي
حد إنه يخوّف حد أو يحطه في موضع سخيف زي كده ، بالعكس
الأديان السماوية بتدعو للرحمة والحنان اللي بنفتقدهم في المواقف دي
، لو عندنا شوية رحمة بالإنسان هنبعده عن الحاجات اللي بتضايقه
وبتخوفه أو بتسبب له متاعب نفسية حتي لو احنا شايفينها حاجات
عادية ، بلاش نهزر في الموضوع ده بالذات لأنه فعلاً مؤلم ، علي الأقل
حاول تحط نفسك مكانه لو تقبل علي نفسك إن حد يضايقك في
حاجة زي كده مش هقولك روح اعملها مع غيرك ، لا يبغي فيك
حاجة غلط كإنسان ولازم تتغير ..

obekendali.com



- آلو أنت فين يا زيكو؟

- أنا في الطريق أهه خلاص

.. بعد ربع ساعه

- أنت فين يا زفت؟

- زيكو : في الطريق أهه ربعاية وأكون عندك

- ربعاية إيه الطريق كله عبارة عن ربع ساعه يا ابني المفروض

إنك توصل دلوقتي

- زيكو : معلش استني شوية أنا خلاص قربت أوصل

- زيكو قولي أنت فين طيب وأنا أجيلك أسهل

- زيكو : تجيلي فين؟

- مكان ما انت واقف

- زيكو : طيب مبدّهاش بقي أنا واقف أدام المراية بلبس أهه ..

- بتلبس !! أمال إيه ربعاية وأكون عندك وبعدها كان ربعاية

وأكون عندك مش معادنا كان الساعه خمسة يا ابني انت؟!

ميكروسكوب

-زيكو : آه معادنا كان خمسة بس أنا قلت لك خمسة ، خمسة
وُنص يعني مالك محبتكها أوي كده

- محبتكها !! يا ابني الساعة دلوقتي ٦ وانت لسه مجيتش وتقولي
محبتكها ، بكلمك وتقولي في الطريق واستناني وانت أصلاً لسه نائم
ومأنتخ في سريرك وتقولي محبتكها ، بتكذب عليا وتقولي قربت أوصل
وأنت لسه بتمختر في بيتكو وتقولي محبتكها !!

زيكو ده مثال موجود في كل بيت وكل شلّة في مصر ، الشخصية
اللي مواعيدها علي طول مضروبة ومشهور بكده بين الناس وعایش
ومتعايش مع الموضوع عادي جداً كأنهم بيمدحوه ، وأخينا ده بقي
مزاج عنده يفاصل في المواعيد لما حد يتفق يقابله في وقت معين ولازم
يبجي بعد معاده بساعه تقريباً إن لم يكن أكثر زي السيناريو اللي
فوق ده وعادي ولا في دماغه بيبجي يتمختر ولا بس ومتأنق ومضببط
نفسه علي الآخر والابتسامه العريضة علي وشه كأنه جاي في معاده
بالثانية ، وشايف دائماً إن الإلتزام بالمعاد ده موضة قديمة كده وحاجة
تقيه علي قلبه والملتزم بيها محبتكها ، ملوش دعوة بقي الناس اللي
مستنياه دي معطلة نفسها عشان المعاد ده وضاع من وقتهم أد إيه
عشان سيادته يصحي براحتة ويعيش حياته وهما بيضربوا أخماس في
أسداس من القلق عليه

رسم محمد

مفهاش مشكلة يعني لما يستنوا شوية ماهو «كل تأخيرة و فيها خيرة» ، وعادي الصاحب لازم يشيل صاحبه والكلام الحمصي اللي بنبرر بيه لنفسنا ده ..

لكن زيكو ميعرفش إن احترام المواعيد من احترام الشخص اللي مستنيك في المعاد ومن احترامك لنفسك كإنسان مسئول و شوية حاجات تانية فوق بعض زيكو مش هيعرفها غير لما يجرب الالتزام ...

إلي كل زيكو في مصر إذا كنا مش عاجبنا حال البلد وحال الحكومة وأي مسئول يبجي لازم ننتقده ونسلخه ونقف له علي الهفوة يبقي لازم نفهم إن البلد دي مش هتتصلح غير لو كل واحد فينا بص لنفسه وبدأ بيها الأول ..

obeykandil.com



رسم عقدة

تولد البنت وتولد معها دعوه تسمعا طوال حياتها أكثر من سماع اسمها .. تلك الدعوه هي «عقبال فرحك» كل الناس يرددون تلك الدعوة في أذن الفتاه ليل نهار فلا تمر مناسبة إلا وكانت تلك الدعوة «أول المعازيم» دون أن يفكر أحد في أن يسأل تلك الفتاة هل هذا هو الحلم الذي تود أن ندعو لها به أم أن هناك ما يشغل بالها غير ذلك!؟

لا أظن أن أحداً في مجتمعنا يري أن هناك شيء أهم بالنسبة للفتاة من الزواج فهم يرون أن هذا هو منتهي الأمنيات وربما يعتقدون أن تلك هي الأمنية الوحيدة لدي كل الفتيات ، وإن لم يكن ذلك فهي تعتبر في نظرهم فتاة غريبة ، متمردة و تعيش في الخيال ، وحين تكبر الفتاة و تصل لسن معين يزداد الضغط عليها من كل الجوانب شيئاً فشيئاً و تزداد الدعوات بأن يرزقها الله بـ«عريس الغفلة» الذي كلما تأخر تبدأ النظرات تتجه للفتاة وكأنها متهمه بجرم ما وتبدأ الأسئلة تدور هنا وهناك وكأن المطلوب من البنت هو أن تكتب لافتة تعلقها علي ظهرها وتقول «مطلوب عريس» !!

هنا تدخل «طنط حشرية» في الموضوع فإن كانت الفتاة تود الزواج بناءً علي رغبة وضغط الجميع ممن يهمهم ومن لا يهمهم

الأمر تبحث لها عن عريس في كل مكان دون أن يطلب منها أحد ذلك ولكم أن تتخيلو ذاك النوع من الزيجات كيف يبدأ ، حيث تأتي الأم مصطحبة ابنها «حيلتها» تبحث له عن عروس المستقبل ومن أول لحظة تضع عينها علي البنت ولا ترفعها إلا وقد راقبت كل شبر فيها ولا مانع من أن تلقي عليها العديد من الأسئلة التي يجب أن يكون نصفها علي الأقل مستفز لتطبق مبدأ «الحما حما ولو ملاك من السما» من البداية.. هذا ولن تنجو الفتاة من تعليقات «طنط حشرية» بأن «البنات مسروعين علي الجواز جتهم خيبة» و «خديو إيه اللي اتجوزوا» وغيرها من التعليقات التي تتناقض مع أفعال تلك الحشرية التي يعلم الجميع أنها مصابة بشيزوفرينيا !

هذا إن رضخت الفتاة لضغوط الجميع أما إن كانت فتاة متطلعة لديها العديد من الأحلام والأمنيات غير فكرة الزواج تود أن تحققها فستدخل «طنط حشرية» أيضاً لتقوم بدورها في «تنغيص» حياة البنت والتدخل في شؤون حياتها بدون إذن وتحاول إقناع الفتاة بفكرة الزواج بكل الطرق الممكنة والغير ممكنة فإما أن تنجح البنت في إقناع الجميع بأن لديها ما هو أهم من أن تحصر نفسها في زاوية ضيقة وحلم وحيد قد لا يتحقق نظراً للإحصائيات التي تشير إلي ارتفاع نسبة العنوسة أو يقنعوها هم بفكرة الزواج الحتمي ومن

رسم عقده

ثم تبدأ رحلة البحث الإجبارية عن «عريس الغفلة» لا أحد منا يعلم لِمَ تدخل تلك الحشرية في حياتنا؟

ولا أحد يعلم ما سر الاصرار علي فكرة الزواج والاصرار علي تلك الدعوة من أول يوم في حياة البنت؟ ولا أحد يعلم لم لا يدعون للبنات بأي دعوة أخري؟ ولا أحد يعلم لم تتم البنات بأنهم «مسروعين علي الزواج» إن رضخو للفكرة من كثرة الضغوط عليهم في هذا الإتجاه؟

ولا أحد يعلم ما سر تلك الهجمة الشرسة التي توجه لأي بنت ترفض التدخل في حياتها وفي هذا الأمر بالذات؟

الأمر الوحيد الذي أعلمه هو أن كل إنسان حر في حياته يخطط و يقرر لنفسه ما يشاء ولا سلطان لإنسان علي آخر في تلك الامور ، إن كنت تود أن تدعو لأحد فلتدعو له أن يوفقه الله لما يحب ويرضي أو تدعو له أن يحقق أحلامه لكن لا تحلم له أو حتي تحاول تحقيق أحلامك في أحد غيرك، فلنحترم عقول وأحلام بعض فكما لك عقل لي عقل يمكنني أن أتدبر به طريقي كما أشاء فان أصبت فهو لي وإن أخطأت فهو أيضا لي فلن يحاسب أحد علي خطأ غيره ..

بس كده ...

obeykandil.com



رسم عهد

كالعادة التلفزيون مفتوح علي برامج التوك شو وكالعادة برضه المذيع بيدير الحوار وكأنه واقف علي فصل ابتدائي في حصة احتياطي والعيال هايصة ومحدث عارف يلهمهم وكل دقيقة «يا فندم نسمع بعض» «الدور هيبجي عليك» «هديك فرصتك والله متقلقش» «يا جماعه بهدوء عشان المشاهد يفهم» ، وفي وسط المشهد الحضاري الجامد فحت ده نادت الست ساسم علي ابنا العلامة الجهيز اللي يقولوا عليه من صفوة المجتمع أصله عقبال عندكوا دكتور ، نادته وقالتله تعالي يا دكتور فهمني اللي بيحصل ده إيه يقولوا جابوا محافظ للأقصر والناس مش راضيه عنه أصله من الجماعه الإسلامية اللي أعلنت مسؤليتها عن المذبحة اللي حصلت سنة ٩٧ و واحد تاني عمال يدافع عن المحافظ ويقولك تاب والجماعه أعلنت إنها تراجع عن العنف وغيرت مواقفها بس أنا مش فاهمة حاجة كله عمال يتكلم ويعك وكل واحد مقتنع برأيه يا ابني وشايف انه صح ومش عاوز يسمع التاني ، حساهم كل اللي شاغل بالهم هو إن كل واحد يفهم التاني برأيه ويفهم الناس إنه صح ، تعالي فهمني كده يا ابني إيه الحقيقة بما إنك دكتور ومفروض إنك من الطبقة المثقفة والناس اللي بتتكلم بلباقة كده واحترام الآخر ، انتو جيل الثورة اللي فيه أمل ، انتوا اللي حاسين بالغلابة وبتشتغلوا عشانهم بجد ربنا يحميكم

رد عليها الدكتور الصفوة وقالها سيبيني يا ماما أنا مش فاضي أصلي برُد علي واد ابن .. «حذفت للرقابة» بيثتم في دكاترة العلاج الطبيعي وقال إيه متضايق أوي إن واحد مننا يقول عليهم كصيادلة بياعين ، ومتضايقين أوي إننا نزلنا نطالب بمساواتنا بيهم في الكادر ، ونازلين فينا شتيمة وقلة أدب وكلام ميطلعش من دكاترة أبدأ ، سيبيني يا ستي أرد عليه خليني أعرفه مقامة اللي يقول إننا مدلكاتية ده خليني أعرفه البقال ده إحنا مين وأهميتنا ايه ، اصبري يا ماما المهنة مستقبلها بيضيع ..

ردت في سرها « بقي المهنة اللي مستقبلها بيضيع و لا برستيجمكو أدام بعض هو اللي بيضيع » !

اللي بيطالب بحق وعاوز يرفع ظلم عن نفسه عمره ما يدوّق غيره الظلم ده ولو بكلمة تجرحه ، إنما اللي زيّكو هيفضل يكاكي أدام بعضه ولا حد فيكوا هينول حاجة عشان نسيخوا الهدف الأصلي وجريتوا ورا المظاهر وكل واحد فيكوا همهم نفسه ، خليكوا لفوا في دائرة مقفولة عليكو وكلوا الطعم اللي اترمي ليكو ، قال وأنا اللي كنت فاكرا انكوا صفوة .. بصلها ابنها الدكتور وقالها بتقولي حاجة يا ماما ؟

رسم محمد

قالت له : أبدأ يا حبيبي ده انا كنت بدعيلك ربنا يديك علي أد نيتك لو نيتك الصالح العام ربنا يوفقك ولو نيتك مصلحة شخصية و مش سائل غير في نفسك فربنا يهديك انت واللي زيك، بس صحيح عاوزه أسألك هو انتوا ازاى بتشتموا بعض كده علي انت وبتقللوا من بعض أدام الناس ، مش انت ده فيه ناس كتير عادية مش دكاترة وكده يعني أكيد في منهم ممكن يتبرجل من المعلومات المغلوطة اللي بتقولوها علي بعض دي ويتأثر بالكلام اللي بيقله كل جنب ويقلل من الثاني

قالها : بصي أنا ومن بعدي الطوفان نخلص مشكلة الكادر وبعدين
نبقي نفكر

تمت ..

لو متضايق من حال البلد بص لنفسك هتلاقك شهبها

للموضوع وجه آخر حاول إيجاده هتفهم القصة !!

obeykandali.com



رسم عقده

عن أحد الأمراض أتحدث .. أيوة هو مرض فعلاً بس تقدرنا
تقولوا كده إنه نفسي مش عضوي وهو يتلخص في حالة الانتقام اللي
بتجيلنا ضد كل البدل العامة المتحكمة في حياتنا .. كلام غريب مش
كده؟! طيب نقول من الأول ..

مين الفاعل؟ الحكومة و دي بقي البدل العامة .. ومين المفعول
به؟ الشعب اللي هو احنا ودول بقي المصابين بإنفلونزا البدل .. ومين
بقي اللي شتخص المرض؟ أنا والعياذ بالله من كلمة أنا .. ما هو كل واحد
في البلد دي قايم بدوره الفاعل بيضرب والمفعول يتضرب فقلت اقوم
بدوري واسيخ للاتنين ...

القصة يا سادة مش جديده علي الساحة ولا حاجة لا دي
قصة بقالها عشرات السنين بس الموضوع في تطور مستمر حيث يبدأ
الموضوع ببعض العجرفة الحكومية من شخصيات سياسية متلاحقة
تلك الشخصيات تمارس نوع من الابتذال واستفزاز الشعب ولا حد
عارف يقولهم يم!! المفعول به هيسكت؟ لا وألف لا ااا ده لازم ياخذ
حقه وبالمرّة ياخذ دوره في الابتزال فيطلع الكبت كله علي أي حد
يقع تحت إيدته ، المهم إنه يدور علي حد يكون له سلطة عليه عشان
يمارس دوره في المرض المزعوم وتخرج إنفلونزا البدل لعالم الواقع حيث
نجد التاريخ القريب يعيد نفسه بالملي فلا يوجد موظف يحب رئيسه

مبكر سكوب

ولا يوجد مدير يحب وزيره ولا يوجد حتى طالب يحب معلمه فالتقهر تفشي وانتشر فيروسه في الجو ليصيب الجميع بحالة إنفلونزا من نوع خاص ليس لها دواء في الصيدليات ، إنفلونزا قتلت أحلام الكثير من الطامحين وقضت علي بريق الأمل في أعين الأطفال قبل الكبار .. محدش عارف ليه أمهات كتير بتضرب أطفالها وهما ماشيين في الشارع -بس- لأنهم شاوروا علي حاجة عاوزينها

لو مش معاكي فلوس مش قضية ممكن تتصرفي مع الطفل بحكمة أكثر من كده لكن ليه ميضربش وياخذ نصيبه من البدلة اللي أهانتك قبل كده !!

محدش برضه عارف ليه مديرين كتير مزاج عندهم يعكنوا علي الموظفين اللي تحت إيديهم حتي لو مفيش ضغط شغل لازم يقهروهم مع إنه لو اتعامل معاهم بلطف هيكسبهم أكثر بس ليه برضه الشغل ميمشيش بغطرسة وكأنه المدير بيخترع قبلة الموسم !!

محدش برضه عارف ليه المدرس بيزعق في تلامذته كل يوم ومر بيلهم الرعب منه مع إنه لو صاحبهم هيجيب نتيجة أحسن للجميع لكن لازم برضه يثبت لنفسه إنه كينج كونج والعيال من خوفهم ركبهم بتخبط علي الجيران !!

رسم عقده

محدث برضه عارف ليه لما بندخل الجامعة ونبقي فاكرين إننا خلاص كبرنا علي حكاية غطرسة المدرسين وتعاليمهم والذي منه ودخلنا مرحلة من النضج في التعامل والحرية بنفاجاً بالنقيض تماما ولازم كل معيدين أولي يقضوها نظام ١/٣ ، والدكاترة العظام اللي بيترسموا علي الطلبة وده كتابي لازم يشتريه الكل حتي لو سعره إيه وده امتحاني لازم أعصركم فيه تنزلوا إجابات ملهاش معني وأرجع أقول عليكمو فشلة وده شفوي لازم وأنت واقف اداامي أحسسك انك ولا حاجة وأوصلك بكلامي جملة واحده بس « اوعي تفكر انك هتبقي حاجة ولا عمرك هتوصل للي أنا وصلته أنت طالب وهتفضل طالب ومن الآخر أنت فاشل » وكلمة فاشل دي بقي تحس إنها عاملة زي صدي صوت بيتكرر من بين سطور كلامه كأنه يقولك بتعصبك يا فاشل طب يا فاشل يا فاشل !!

محدث عارف أسباب كل الحاجات دي لكن التفسير الوحيد ليها هو إنفلونزا البدل اللي صابت معظمنا ، كله بيعس بالقهر من اللي فوقه وبيدور علي أنسب حد ممكن ينفس فيه عن إحساس الظالم اللي جواه ، قليل مننا اللي يفكر بإيجابية شوية ويحاول يمنع وجود أي احساس سلبي أو ظلم وقع عليه

صناع الحياة من فترة أطلقت حملة «إحنا شعب أصيل» صحيح

مبكر سكوب

عددي وقت طويل علي الحملة ، لكن خلّونا نبقي شعب أصيل بجد
ونتعالج من انفلونزا البديل

أنا هتعالج تحبوا تيجوا معايا !!

obeykandil.com



رسم محمد

بكل أناقة سأل سواق الميكروباص «مترو يا اسطي» ؟

السواق : اركب يا برنس

هكذا تبدأ الحكاية دائماً وأول ما البرنس يحط رجله علي السلم يطير السواق بالميكروباص ، ملوش دعوة بقي الراكب طلع خلاص ولا لسه نُصّه بره الميكروباص ، المهم إنه ضمن راس ركبت معاه ، عشان يتفرغ للوصلة الشهيرة بتاعة بعد إذن الناس نفضي الطريقة ، وفاضية جوة ، واللي طلع بيعت يا حضرات ، وسّع يا كابتن للي طالع

وكالعاده سايق بكل روقان ومشغّل وصلة أغاني مش بيتفهم منها كلمة ، السواق والتبّاع هما بس اللي بيبقوا فاهمين الكلام ! ، الحكاية كلها عبارة عن مُغني بيتشقلب في الأغنية والسواق بيتشقلب معاه بالميكروباص وكلاكسات بقي ماشية مع النعمة اللي شغالة ويكأنه فرح ابن العُمد بالظبط !!

وفجأة يدخل السواق في المود ويزود السرعة كأنه ماشي لوحده في الشارع مع خمسات بيعملها عشان يعدي من بين العربيات ، مش مهم في الخمسات دي مين وقع علي القاعدين ولا مين بقوة الخمساية اتحرك من نص الميكروباص وبقي في حُضن السواق ، كل ده عادي وهتلاقي السواق بيرد عليه بكل برود « ما تمسك نفسك يا برنس » ،

رسم عهد

هتنزل بعدها بمحطتين كده ولا حاجة ! ماهو علي ما يسمع ويوقف
الصاروخ اللي هو سايقه ويختار مكان ما بين محطتين عشان يريخ
نفسه وينزل كام زبون سوا بدل ما يقف كتير يبقي حضرتك ممكن
تنزل آخر الخط إن شاء الله ، اتخانق بقي وزعق واعمل اللي عندك
ولا هيتهمز شعره من السواق ، كبيرك أوي هتلاقي الركاب بيهدوك
ومعلش يا ابني وخليها عليك وكلام من ده عشان يعدوا الموقف
وعشان السواق ميتهورش عليك ولا عليهم ، لازم طبعا يعملوا حسابهم
وميستعدوش السواق أوي أنت نزلت خلاص لكن هما اللي مكملين
معاه فقرة الساحر ..

نزلت؟ نزلت خلاص؟

الحمد لله

الواحد أول ما بينزل بيحس كأنه خارج من حرب الاستنزاف
ولازم يسجد ركعتين شكر إنه لسه علي قيد الحياة وبيطمن كده علي
حاجاته ، العين في مكانها والودان زي ما هي و ايدي جنبي أهه
ورجلي تحتي ، مفيش حاجة اتشقلبت ؟

كده تمام ، أحمدك يا رب

obeykandil.com



رسم عهد

بنظاراته الشمسية الأنيقة وملابسه الهندامة التي تدل علي انه
«ابن ناس» كما نقول وقف في محطة مترو إحدى المناطق الشعبيه
وظل ينادي بصوته المرتفع «تمرد تمرد تمرد ، حملة تمرد» ، وظل يكرر
تمرد يا بيه ، تمرد يا آنسة ، تمرد ! ظل هكذا حتي مرت بجانبه فتاة
في نفس عمره تقريباً ، فقال لها تمرد يا آنسة ؟

ردت عليه : لا

سألها : ليه ؟

قالت له لست مقتنعه بتلك الفكرة وقبل أن تكمل حديثها
بادرها بجمل من نوعية «أيوة أيوة فهمت اخوان بقي وشغل الخرفان
بتاعكو هيشغل وبنحبك يا مرسي وهنكمل المشوار يا مرسي مش
كده ؟ قبل أن ترد عليه تلك الفتاة فوجئت بشاب آخر يقترب منهم
ويشترك في الحديث ويوجه لها الكلام بارك الله فيك أختاه ، أيوة كده
هو ده الصبح يا آنسة مترديش عليه أنت صح إحنا اللي هننصف البلد
لما ننزل نؤيد الرئيس ، سيبك منهم أصل العيال دول سيس وخونة
ومولين ، أيوة أمان جايبين الفلوس دي كلها منين اللي بيصرفوا منها
علي الحملة ؟

ردت عليه الفتاة بكل ثقة « لا علي فكرة هما مش خونة ومش

معني إن الحملة مصروف عليها جامد يبقي ممولين من برة وإلا بقي
تبقوا أنتو كان إخوان ممولين وخونة وعملاء .. ، في تلك اللحظة
شاركها الشاب الأول الرأي وراح يثني علي كلامها قائلاً « قوليله يا
آنسة قوليله ، أنا قلت من الأول الإخوان دول خرفان وملهمش فيها
محدث صدقني، ها يا آنسة هتمضي معانا بقي تمرد ؟ »

فسارع الشاب الثاني صاحب فكرة العمالة والتمويل الأجنبي
قائلاً : «أيوة أيوة امضي ، مضيتها يا واد يا ابن ... » حذف الجملة
للرقابة امضوا واخربوها هو الواحد مستني إيه من واحده متبرجه
كده زيك !!

ردت البنت عليه « مش أنا من شوية كنت أخت فاضلة وبارك
الله فيا و بتشيد برأيي؟ » لم يرد عليها ذاك الشاب وهم بالذهاب بعيداً
عنهما، فنادته الفتاه استني يا أستاذ وانت يا فندم انتو الاتنين اسمعوا
كلامي ده كويس أوي ، أولاً أنا لا إخوان ولا أنا تبع تمرد ولا ليا أي
انتماء سياسي أصلاً، أنا مصرية وبس بحب بلدي ومش هنزل لا في
تمرّد بتاعتك ولا في المظاهرات المؤيده بتاعة الجهة الثانية أنا لو نزلت
هنزل أتمرّد صحيح بس هتمرّد عليكموا أنتو الاتنين وعلي اللي زيكو
اللي بيتكموا أكثر ما بيسمعوا ، اللي ماشيين بمبدأ من ليس معي فهو
ضدي ، اللي شايفين الصح من وجهة نظرهم وبس ويا الصح بتاعنا يا

رسم عقل

بلاش حاجة غيره متنفعناش ، هتمرد علي العقول المترسة والنفوس المريضة بداء المصالح والتعصب ، هتمرد علي كل غلط وهشتغل علي كل صح ، هلف بحمليتي في كل بيت وفي كل شارع ، عارفين هقول للناس إيه ؟

أنا لا هقولهم يسقط حكم المرشد ولا هقولهم ثوار أحرار هنكل المشوار يا عشيرة ، هقولهم حاجة واحده بس ، فوقوا بقي ، كفاية انقسام ، كفاية تخوين عمال علي بطل ، تعالوا ننصف من جوانا ، تعالوا نحاسب نفسنا الأول قبل ما نحاسب أي حد و نهمه بأي تهمة كده - بس - عشان ميشبهناش في فكرة معينة ، هقولهم كلام كتير أنتوا متفهموهوش .. نظروا إليها و لم يبد أي منهم رد فعل وسار كل منهم في اتجاه بعيداً عن الآخر، نظرت إليهم الفتاة بنظرة وكأنها تقول « يا رب يفوقوا بقي » ثم أوقفت توكتوك و قالت له « توصلني و لا ليك رأي مخالف أنت كان ؟»

رد عليها السائق و كان طفلاً لا يتجاوز الثالثة عشرة من عمره و قال « اركبي يا آنسة اركبي هو اللي زيننا له رأي في حاجة ، احنا محدش بيفتكرنا إلا لو كان عاوز مننا حاجة و بقية السنة يقولوا علينا بيئة »

obeikandi.com



بيقولك !!!

هو مين اللي دائماً يقولك ؟

مش عارفه .. بس واضح انه حد جامد أوي و واصل كان ، ده بيعرف يجيب الخبر من بُق الأسد .. آه والله ، يعني فجأة كده تلاقي واحد داخل عليك بخبر ويبتديه بـ«بيقولك» يفجر قنبلة في وشك ولما تدور علي أصل الموضوع هتلاقيه بينتهي دائماً عند واحد اسمه «بيقولك» .. بس يقولك ده قال كتير أوي .. ده جاب في سيرة الناس كلها .. لدرجة مرة لقيت واحده جاية تقولي «اسكتي يقولك إيمان ماتت» !!

قلت لها «إيمان مين؟!» قالتلي انتي ... وبتسألني الخبر ده صحيح ولا لا؟؟

بس أنا لما عرفت إن «بيقولك» هو اللي قال الخبر ده اتأكدت إنه صحيح

أكيد يعرف أكثر مني ... ده يقولك يا عم مش أي حد يعني

ملحوظة : الكلام ده حدث بالفعل أي والله حصل

وبيقولك ده بقي عارف أخبار العالم كله يعني الست اللي رمت

مبكر سكوب

جوزها من الدور الـ ٢٠ في كوالالمبور وصلني خبرها عن طريق «بيقولك» .. أكيد رمت جوزها و ادت «بيقولك» رنه

ده غلب ناسا يا جدع ، حتي في الدراسه كل المدرسين وحتى
الدكاترة بيختلفوا في المعلومات لكن هتلاقيهم متفقين علي حاجة
واحدة بس ألا وهي إن المنهج من تأليف «بيقولك» .. كل حاجة
«قالك إيه بقي» ، و«بيقولك الجزء ده مهم» !

يا خوفي لا يبجي يوم و ألاتي واحد يقول «بيقولك أنا بحبك» أو
«بيقولك تتجوزيني» ؟

تفتكروا بقي ساعتها مين اللي بيحبني هو ولا بيقولك؟! سؤال
يطرح نفسه !

لو حد عرف «بيقولك» ده يطلع مين يقولي أحسن «بيقولوا
«إنه بعافيه شوية» !!

obeykandil.com



رسم عقد

عزيزي الراكب حرصاً منا علي راحتك وسلامتك ولسهولة عملية الصعود والنزول من وإلي عربات المترو يرجى الالتزام بالأبواب المخصصة ، وتفصيل بقي أيهم باب الصعود وأيهم باب النزول ..

الرسالة دي فضلت تتكرر في محطات المترو كام شهر كده واتصرف علي الحملة دي كتير من رسايل صوتيه زي اللي فوق دي لملصقات موجوده جوه عربيات المترو لأسهم اتعملت علي أرصفة المحطات ، لكن لا حياة لمن تنادي ، المواطن المصري الأصيل لازم يسبب بصمته في أي مكان والبصمة دي هي عدم الالتزام بالتجربة اللي فشلت فشل ذريع وبسرعه فوق ما تتخيل ، الموضوع أساساً مكملش كام شهر علي بعض والناس كانت بتسمع الرسايل دي كأنها بتسمع نشرة أخبار اليابان مثلاً ، مش حاجة تبعنا يعني ولا كأن الكلام لينا خالص ، الأغرب بقي إن اللي كان بيلتزم بالتعليقات دي مكش بيسلم من تعليقاتهم ومصمصه شفايفهم خصوصاً لو انت في عربية السيدات ، الستات طبعاً متتوصاش في الحركة دي ، وفي بقي اللي كان يلاقيك معدّي من عند باب الصعود ورايح ناحية باب النزول يصدر لك نفسه كده عشان متعديش ويقعد يقولك متنزل من هنا ما الباب أهه ، وإيه الالتزام ده وشوية كلام كده يحسسك إن الطبيعي اللي هما بيعملوه وإنك لما تلتزم بقي أنت اللي غلط ولازم

مبكر سكوب

نرتّم عليك لحد ما ترجع عن اللي في دماغك ! ، وفي نوع بقي بيحب الالتزام من بعيد لبعيد ، يعني يحب يشجع الناس الملتزمة بابتسامة كده أول ما يطلع أو وهو نازل أو بكلمة حلوة ، لكن مش بيلتزم إلا لو حد أخرج به بالدوق كده ، النوع ده بيقتي مستني الناس كلها تتصلح عشان يمشي هو صح ، إنما علي الأقل أحسن من اللي بيعمل الغلط ومش عاجبه الصبح ويرخم عليه كان ، كل ده بيثبت إننا كشعب بنحب نهدر المال العام ، أيوة هي الحملة دي مش اتصرف عليها فلوس واحنا بعدم إلتزامنا أفشلناها قصد ، يبقى الفلوس دي اترمت في الأرض لأننا اضطررنا السادة المسؤولين مشكورين الحقيقة يغيروا الحملة ويشغلوا رسايل جديدة وهي الالتزام بالنزول أولاً ثم الصعود أياً كان بقي الباب اللي هتطلع ولا هتنزل منه ، حملة كده اتعملت تقريباً حفظاً لماء الوجه اللي باظ بسبب تطيش الشعب للحملة المذكورة ، والحملة دي كان محدش التزم بيها برضه لحد ما بطلوا يشغلوها أساساً واكتفوا بجو التعبئة العامة اللي بيعملوه كل ما تحصل أحداث جديدة أو مظاهرات عارمة تسود البلاد ، بيقدوا يشغلوا أغاني وطنية كده ودمتم ..

الموضوع بقي في المترو مش متوقف علي أبواب الصعود والنزول اللي محدش بيلتزم بيهم دول ، لا طبعاً مينفعش ، إحنا استحالة

رسم عهد

نسيب فرصة ممكن نزوع فيها من التعليقات والارشادات والكلام اللي يمّوع النفس ده ، عندك بقي الرجالة بتحب أوي تركب عربية السيدات ، المفروض إن العربية عليها يافطة كده واضحة تسد عين الشمس ، لكن عادي في ناس بتبقي مستعجلة ومش بتاخذ بالها ، الأدهي بقي إنه لما حد ينهمم في اللي بيعمل من بنها و« أصلي نازل قريب » وتفضل الناس تتخانق معاه لحد ما ينزل في المحطة اللي هو عاوزها برضه ويبقي نازل منتعش أوي إنه نفذ اللي في دماغه ، وفي اللي بينزل بس بعد ما يسجل اعتراضه ويقعد يزقق لزمته إيه عربية السيدات دي وليه عملوها واللي يقولك هو انتو لما بتركبوا عربية الرجالة حد بيكلمكوا - ده علي أساس إن في حاجة اسمها عربية رجال أساساً مش عربية مختلطة - ويتخنك في صوته كده عشان بيان إنه معترض ، أمال إيه احنا في بلد ديمقراطي وكل واحد بيقول رأيه بمنتهي الحرية ...

في ناس بقي لدوده أوي بتحب تخترع قوانين بمزاجها ، يعني مثلاً معروف إنهم عربيتين للسيدات في المترو واحده خضرا ودي بتفضل سيدات لحد ٩ مساءً والثانية حمرا ودي طول فترة التشغيل وبرضه جهاز تشغيل المترو عملوا رسايل في المحطات بالموضوع ده ، بس واضح إننا عندنا مشكلة مع الرسايل مش بتيجي علي هوانا تقريباً، فلناقي

العربية الخضرا مرشقة رجالة من الساعة ٨ بالليل ولما حد ينبههم ويطلب منهم ينزلوا يقولك خلاص بقي ده هي كلها شوية مش فارقة كتير!! وهو حضرتك هتخسر حاجة لو ركبت مكانك؟! ده غير بقي الناس اللي بتركب العربية الحمرا ، وده بقي أعنف نوع ممكن تشوفه ، الواحد منهم بيبيقي راكب وحالف مية يمين مش هينزل غير لما تيجي محطته حتي لو العربية كلها تظاهرت ضده ، هيقولك مش نازل يعني مش نازل وبعدين الساعة عدت ٩ ، يا سيدي العربية دي طول فترة التشغيل للسيدات ، برضه مش نازل ، يهديك يرضيك ، برضه مش نازل ، الغلاسة بقي إنك تلاقيه قاعد مش واقف كان ، يا ساتر علي الغلاسة ، طيب يعني راكب غلط وقلنا ماشي بنفهمك ومش عاوز تقتنع قلنا أصحاب العقول في راحه ، إنما قاعد كان ، أهه ده اللي يرفع الضغط ، و اللي يرفع الضغط أكثر وأكثر لما يقولك أصل أنا قاعد مع مراتي !!! ، طيب حضرتك خدها واقعد معاها في العربية المشتركة ، يقولك لا ما هو هناك في رجالة !! ده علي أساس وجود حضرتك بالنسبالنا إيه ؟ وتلاقي بقي الست اللي معاه تقولك هو عمك حاجة ولا قرب منك؟! ، لا حضرتك هو لو قرب مني مش هبقي واقفة بتناقش معاكوا بلساني ده هيبقي في لغة تانية خالص ...

وخذ من ده بقي كتير مواقف لا تُعد والفكرة إن اللي بيعمل

رسم محمد

الغلط عارف إنه بيعمل حاجة غلط ، لكن مقتنع بيه جداً وفرحان بنفسه وبيدافع عن نفسه وبقينا بنحلل الغلط لنفسنا ونعمل فيها فتوّات ونقعد نبعبع طالما احنا اللي عاملين الحاجة الغلط لكن لو حد غيرنا غلط بنقعد نصطاد له في الميّة العكرة ..

قيس موضوع المترو ده علي كل حاجة في حياتنا هتلاقينا بنعشق نمشي عكس ونموت في التبرير ومع ذلك نقعد نقول الحكومة غلطانة و البلد بايظة ومفيش حاجة صح ، ما هو حضرتك البلد دي أنا وأنت والحكومة وكل واحد فينا ، لو مشينا صح من أبسط المواقف و مسكيتناش علي حقنا ، هنلاقي الحال انصلح بجد ، بس ده لو عندنا رغبة حقيقة في الإصلاح مش عاوزين نقعد ونحط رجل علي رجل و لما البلد تنصلح أبقى أمشي أنا عدل وهو يعني هتيجي علينا ، يا رجل كبر مخك ..

فعلاً يا رجل كبر مخك ، بس كبر مخك واعمل الصح !

obeykandil.com



رسم عهد

أيها الأخوة المواطنين ، جاءنا البيان التالي .. قررت الحكومة المصرية الموقرة القضاء علي مشكلة القمامة ، تلك المشكلة التي تشغل الرأي العام والخاص والدنيا كلها وشغلت حكوماتنا المتتالية اللي عمالين نغيرهم واحدة ورا الثانية ومحدث عارف أخرتها إيه ، المهم قررت الحكومة القضاء علي مشكلة القمامة بالقضاء علي صناديق القمامة نفسها !

وهو ده الجديد في الموضوع ، طبعاً إحنا في مصر أم الدنيا وعندنا كل حاجة فريده من نوعها وعشان كده لما حبوا يحلوا المشكلة جابوا من الآخر ، إحنا لسه هنتخايق نزود فلوس الزبالة علي وصل النور ولا نحصلها لوحدها عشان يطلع لنا مواطن متمرد علي الواقع و يقولك إن مفيش حد بيعدي يلم الزبالة أصلاً ، لأ طبعاً ، الحكومة قعدت كده ومخمنجت و طلعت لنا بالحل الجهتمي ده وراحت شايلة صناديق الزبالة خالص في مناطق كتير فبدل ما الناس كانت محترمة نفسها وبترمي جوه الصندوق والقلة المندسة اللي بتحب تشاغب كانت بتيجي لحد الصندوق مشكورة عشان ترمي جنبه مش جواه أو واحد منهم يتخيل نفسه في ملعب الجولف ويرمي الكيس كأنه بيحذف كرة سلة ولأنه عمره ما لعب سلة أصلاً فطبيعي كانت محتويات الكيس بتتناثر علي الأرض جنب الصندوق الموقر والمتنازع عليه ، وبدل ما

مبكر سكوب

الناس تقعد تشتكي من الشركة المسئولة عن النظافة إنها مش بتبع
عربيات تفريغ صناديق الزباله في مواعيد مضبوطة والصناديق ممكن
تفضل يومين ثلاثة كده لحد ما تتلمي علي آخرها وتصبح ملجأ لهواة
البحث في الزباله وطبعاً عملية التنقيب دي بينتج عنها أشياء مبعثرة
هنا وهناك !

الحكومة سمعت الشكاوي دي كلها وغيرها و حبت تريح المواطنين
من مشاكل الصندوق وبالمره حبت تريح نفسها بطريقتة « لو مش
عاجبك الصندوق ، نشيله » !

وهي دي أسلم طريقة بتتعامل بيها الحكومة مع مشاكل المواطنين
«تريح الدماغ » واللي مش عاجبه يخبط راسه في الحيط بكل
سهولة ، ما هو أنت لو فاكر إنك ممكن تروح لرئيس الحي وتصعد
الموضوع عن كده وتجب حل يبقي أنت بتحلم ومش بتش من نيلها
ولا جربت تغنيها ، أصل الحكومة إيه غير رئيس حي وشوية سلطات
فوقه لحد ما نوصل للوزراء كل اللي في أيديهم إنهم يتخانقوا في البرامج
الانتخابيه هنخليها مدنية ولا عسكرية ولا دينية ويفضلوا يطلعوا
في البرامج يتخانقوا علي هوا برضه في الأيدلوجيات والبيروقراطية
والنظام الرئاسي والنظام المختلط والنظام البرلماني وشوية كلام كده
نص الشعب مش فاهمه !!

رسم عهد

عزيزتي الحكومة المصرية اللي مش عارفه مين اللي هيبقي
ماسكها علي ما يتنشر الموضوع ، يا كل واحد شغال في عالم السياسة
، يا كل واحد بيطلع علينا في البرامج الحوارية وعمالين تتخانقوا علينا
كأننا ورث مثلاً ولا حاجة ، لو فعلاً بتشتغلوا لصالح البلد زي ما
عمالين تقولوا ليل نهار فالمواطن كل اللي يهّمه هو إنه ياكل ويلاتي مَيّه
نضيفه ويعيش في مكان نضيف ويلاتي وظيفة وإلي آخر القايمه اللي
بتفتكروها في برامجك الإنتخابية وبس ، المواطن لا يهّمه نظام رئاسي
ولا برلماني ولا مختلط ولا أصلاً المعظم فاهم التقسيمه دي ، طالما
أنتوا عارفين احتياجات المواطن فعلاً فبدل ما تحطّوها زينة في ورق
بيتنسي بعد ما تخلص الانتخابات ، حققوا الأساسيات دي للمواطن
و بعدين تعالوا نتخانق علي الكلام الكبير بتاعكو ده .. أصل اللي
نعرفه إن اللي عاوز يخدم هيخدم من أي مكان وبأي طريقة وطالما
كلنا بنحب البلد والعروبة قاتلانا أوي كده بيبقي كفاية استعراض
ونشتغل للبلد دي اللي عمالين نغني علي أطلالها ..

خلص الكلام ...

obeikandi.com



رسم عهد

(رُش الشارع مية ده عروسة الغالي جاية) أغنية من التراث الشعبي كنت بسمعها كتير وأنا صغيرة وكنت بستغرب أوي ، هو إيه اللي رش الشارع مية ونرشه ليه وليه أصلاً نرمي مية في الشارع ! عشان العروسة جاية ! طب أهلاً وسهلاً يا ستي ، شفتي الشارع وهو مبلول ولا المية نشفت علي ما جيتي !

وفضلت الأفكار دي كلها في دماغي بتدور حوالين ليه نرش الشارع مية لحد ما بدأت أشوف الناس في الصيف وكل واحد طال من شباك في الدور الأرضي وماسك خرطوم ويرش الشارع مية وكل محل طالع منه خرطوم وبرضه بيرش الشارع ، وقتها بقي سألت هما بيرشوا الشارع ليه ، هو في عروسة جاية وهتلف شوارع المنطقة كلها!

فقالولي لأ دول بيرشوا الشارع عشان الجو حر والمية بترطب الجو !! افكرت علي طول أمي وهي بتقف طول الليل تملأ كل الزجاجات و الجرادل وأي حاجة تيجي تحت إيدها كانت بتملأهم بالليل عشان المية كانت بتقطع طول النهار عندنا - ده طبعاً قبل ما نركب موتور المية واللي شغال عليه نُص سكان مصر دلوقتي - ، المهم استغربت إزاي المية بتقطع والناس دي بكل سهولة بيرشوها ويعملوا عليها أغنية تستفز الناس اللي عايشين علي مية تم تخزينها ويستخدموها بالقطارة !!

ولما كبرت بقي وبدأت مشاويري تتعدي شارعنا والشوارع اللي حواليه من مُهدري المياه بخراطيم رش الشارع لقيت الناس بترمي زبالة في المية وفي ناس بترش المية بمية تانية مش نضيفة صرف صحي بقي وغيره كلنا عارفين البلاوي اللي بتحصل في النيل اللي شوية وهيهرب من عمالنا ..

أنا وقتها بقي قلت إذا كان الشارع بيترش بالمية وإذا كانت المية نفسها بترش برضه بالمية وبنلوثها ، ليه بقي داوشينا بالنيل ومصر هبة النيل ودروس عن النيل في المدارس وبرامج وشعر بيتقال في النيل وشوية الكلام الكبير ده اللي محدش بيعمل بيه كبيرنا نقعد نهزّ راسنا مع اللي بيتكلم ومتسلطين بالكلام أوي ، بيتقال ليه الكلام ده لما الناس كلها بترش المية ومش بتحافظ عليها !

عجباً ليك يا نيل موجود في بلد نصها بيتكلم حلو عليك عشان يوعّي نص تاني مش فاهم قيمتك وبيرمي ميّتك علي الأرض واللاتين صوّتوا لما أثيوبيا قررت تبني سد يقلل حصة مصر من النيل والعجب أكثر وأكثر إنهم سابوك وقعدوا يتخانقوا مع بعض مين أنسب واحد يحل المشكلة فيهم وفي الآخر نسيوا إنهم بيتخانقوا عشان يرجعوك وكل اللي افكروه إنهم بيتخانقوا مين فيهم بيعرف يدير البلد ويحل مشاكلها أحسن من الثاني بس محدش وّرانا إزاي هيحل المشاكل

رسم عهد

ولو حتي مشكلتك أنت يا غالي يا اللي مستحملنا من زمان بجلونا
ومُرنا علي مر العصور .. يا خوفي لا نفضل نتخايق والحناقة تطول
ونفضل ناسيينك ويسرقوك منا ونصحي في يوم نلاقيك نشفت من
عندنا وسبتنا ، وقتها هنندم علي كل نقطة مية رميناها بجد أو حتي في
أغنية ، بس مش عارفة بقي هنندم علي خناقاتنا اللي عملناها عليك
ولا هنفضل ناسيين إن الحناقة كانت عليك أصلاً !

مش لاقية قفلة أحلي من آمال ماهر وهي بتقول « بعطش يا
نيل للسلسيل وأنت حنين مش بخيل »
يا رب تفضل معانا ومتطلعش بخيل ..

obeykendi.com



رسم عقده

كل المفروض مرفوض اثبت للعالم إنك موجود ..علشان لازم نكون مع بعض علشان شايلانا نفس الأرض .. يا حبيبتى بتسألني دائماً كم شخصية بشوفها أنا فيكي أنا أكثر من شخصية و كل ما فيا بيحلم بيحلم بيك ..

في كل مناسبة وعلي مدار السنة بتجدد شبكات الاتصالات عروضها بأغنية ، إعلان وغيره كثير من الوسائل ، والعروض دي طبعاً بيقتي غرضها هو استهلاك الناس لمكالمات أكثر وأكثر فيبرخصوا الدقيقة جامد أو يدّوا دقائق مجانية كثير ، فيبدأ بعض الناس الفاضية في استغلال العروض دي في الغلاسة علي خلق الله

في اللي ين لك وأول ما تفتح يقفل في وشك فيستفرك وتعدوا تلعبوا مع بعض بقي ، رن افتح اقفل والبقاء لصاحب النفس الأطول فيا إما هيزهق ويشوف رقم غيرك يلعب معاه أو أنت هتبطل ترد عليه وتعمله بلوك

وفي نوع أغلس بقي اللي يتصل و يقولك « ممكن نتعرف » !ده أنت قديم أوي يا جدع الحركات دي اتلغت من أيام الهكسوس أيام ما كان التليفون الأرضي هو وسيلة الإتصال بالعالم ! ، والنوع ده مهما فتحت عليه وسبته يهاتي مع نفسه بيفضل يتصل برضه

مبكر سكوب

حماسه مبيقش أبداً ، وقتها بيقتي هاين عليا أروح أعمل بلاغ في شركات الاتصالات اللي بتعمل العروض المجانية دي وبتدي فرصه لمحبي الغلاسة في ممارستها علينا ليل نهار من غير كلل ولا ملل .. النوع الأغلس واللي بيقتي مكشوف من أول لحظة وبيستفزني غباؤه هما الناس اللي تتصل وتقولك أنا حولت لك خمسين جنيه بالغلط حولهم ليا معلش !

خمسين جنيه بحالمهم يااه ده الواحد هيحارب شيطانه جامد بقي عشان بيعتهملك أصلهم خمسين جنيه مش فكّه يعني ، وتخلص المكالمه من هنا تلاقي في قفاها رساله من نفس ذات الرقم اللي اتصل بيك وبتقول إنه الرقم الفلاني حول لرقمك مبلغ كذا وشوية حبشتكانات كده عشان تسبك الدور عليك ، مش هكذب وأقول إني فقستهم من أول لحظة ، لا خالص هما مفقوسين لوحدهم ، يعني الرقم اللي بيعت الرسالة هو نفسه الرقم اللي بيتصل مع إن المفروض شبكة الاتصالات هي اللي بتبع الرسالة دي ، سيبك من كده أنا كل اللي فارسني هو إني تخيلت إنه جه اليوم اللي دخل رصيدي خمسين جنيه وأجي أعمل إستعلام عن الرصيد ألاقيه خمسة جنيه ! ، لا الشركة نصبت عليا في صفر مليش دعوة أنا عاوزه الصفر بتاعي وفجأة الواحد يفوق من صدمته علي مكالمه من نفس الرقم اللي ناوي يكمل اللعبة السخيفة

رسم محمد

، ويكلمك بكل برود ويقولك ها يا فندم ابعت ليا الرصيد بقي وبلاش
نصب !

رصيد ، أنا اللي بنصب ، لا النمرة غلط يا عماد ، وفي تلك
اللحظة طبعاً بيقتي كل اللي معاك في البيت عرف الموضوع وكله بيشد
منك الموبايل عشان يقوم بالواجب مع أخينا ده اللي بيقتل فوراً
أول ما يلاقي الموضوع دخل في الجد وممكن يتهزق ، طيب ما كان
من الأول ، نحترم نفسنا ونبطل الأعيب العيال الصغيرة دي .. إنما
ازاي ييتقي في عرض دقائق أو رسايل جديد وأنا مستخدمهوش ! لازم
أستخدمه حتي لو مش لاتي حد من معارفي أكله همتزع أنا حد
أتعرف عليه ، أرخم عليه ما هو أبو بلاش كتر منه بقي ..

أنا بقي من موقعي هذا كمواطن تعرض لكثير من الحركات الغلسة
دي وغيرها ، أطالب وبشدة .. أكيد مش هطالب بإلغاء العروض
والدقائق المجانية ، لأ طبعاً أمال أنا هتكلم ازاي يعني وأرغي مع أصحابي
متفهمونيش غلط ، أنا قصدي إنه بما إنكم عمالين تقولوا عروض
ملهاش نهاية وكل يوم عرض جديد والحبشتكانات بتاعتكو دي ،
والنبي ضيفوا لنا خاصية الإبلاغ عن الغلاسة وأي عميل يفكر يلعب
اللعبة السخيفة دي معانا نبلغ عنه و توقفوا له خطه يومين كده ولا
حاجة ولو حد اشتكي منه تاني دفعوه غرامة ، وأهه لما تخسروا عميل

مبكر سكوب

غلس أحسن ما تخسروا بقية العملاء اللي هو بيغلس عليهم ..تخيلوا كده لو العرض ده اتنفذ علي أرض الواقع هيبقي إعلان جامد جدي وبما إننا احنا مواطنين غلسين بطبيعتنا فشركات الإتصالات هتتم فلوس غرامة أأأأأأأأ كده ومعظمها هيبقي أصحاب بيلغوا عن بعض ، أهه غلاسة كده ، أنا مش مسؤولة عن الناس دي أنا قلت رأيي ولو المقال ده وقع تحت إيد أي واحد بيشتغل في تسويق الشركات دي ونفذه مش هقولكوا عاوزه حقي في براءة الاختراع ، لا ده كله لوجه الله وربنا يقدرنا علي فعل الخير

اقعدوا بالعافية ...

obeykandil.com



رسم عفتل

زمان وأنا صغيرة كانت خالتي مريضة بمرض القلب ومحتاجة عملية «قلب مفتوح» لكن للأسف فضلت خالتي مستنية دورها يبجي للعلاج علي نفقة الدولة وفضلنا مستنين إحنا كان ، كنا مستنين يبجي اليوم اللي تعمل فيه العملية وتخف آلامها وتتوقف رحلاتها ما بين مستشفيات مصر الحكومية اللي زرتها فيها أكثر ما كنت بزورها في بيتها ، وفضلنا مستنين ولصغر سني مكنتش فاهمة أوي هو إحنا بنستني ليه وكنت بقول كثير مش مفروض إنها تعبانة أوي وكل شوية يحجزوها في المستشفى وعارفين حالتها يعني لازم يعملوا لها العملية فوراً رافة بها ويلحقوها قبل ما حالتها تسوء عن كده ، سؤال يبدو ساذج في الوقت الحالي مش كده؟!

للأسف مفهمتش سذاجة السؤال ولا فهمت سبب إلحاح خالتي عليا و أنا صغيرة إني لما أكبر أكون «دكتورة في جراحة القلب المفتوح» -زي ما كانت بتقول- مفهمتش الحاجات دي إلا لما كبرت وبقيت دكتورة ، صحيح أنا مدخلتش طب وعمرى ما هشتغل في جراحات القلب المفتوح زي ما كانت بتحلم لكن دخلت علاج طبيعى وفي الكلية دي لفيت علي مستشفيات كثير وشفيت حاجات كانت كفيفة إنها ترد علي كل أسئلتى الطفولية الساذجة اللي كنت بقولها قبل ما تروح خالتي عند ربنا وهي مستنية دورها اللي مجاش وشكله مكنتش

رسم عهد

أعلي تبقي هي الكسبانة ، والمسابقة دي هيعملوها علي الناشف كده ؟ أكيد لأ يعني ، لازم طبعاً يبقي في حافز ليهم والحافز ده هو الموبايل الصيني أبو صوت عالي ده اللي بيسمع الجيران وجيران الجيران لازم يشتغل علي آخره عشان يتمزكوا كويس في مسابقتهم وده طبعاً مع كامل احترامنا للافتة « الهدوء لراحة المرضى » في الحقيقة مفكرش إني شفتها قبل كده في مستشفى حكومي من اللي عدت عليهم ...

مرة كده كنت في مستشفى ضمن سكاشن العملي بتاعتنا وكنا بنشتغل مع حالة وبعد ما خلصنا الجلسة الراجل كان مبسوط إن في حد بيهتم بيه وسألنا هتيجوا امتي تاني ، قلنا بعد يومين ، قالنا هستناكوا ، بس الحقيقة واضح إنه استريح أوي للجلسة وكان مستعجل علي الجلسة اللي بعدها بدليل إننا لما رحنا تاني لقيناه مستني بسريره بره العنبر !

وبسؤالنا قاعد هنا ليه يا حاج ، قالنا أصل العنبر زحمة ومفيش مكان جوّه فخرجوني هنا لحد ما تُفرج !!!

لك أن تتخيل صدمة الخبر ، أنا قلت يعني كبيره قاعد بره علي ما يظبطوا السرير ، بيغيروا أماكنها ، أي حجة كده مقنعه لكن قاعد في الطرقة عشان مفيش مكان ، أهه ده اللي عمري ما تخيلته أبداً ،

مبكر سلوب

سيبك من إن احنا دولة متقدمة ولا متخلفة دلوقتي، ده أبسط قواعد احترام المريض هو إنك تقعه في أوضه لوحده كده مش في الطرقة واللي رايح واللي جاي عمّال يخبط فيه واللي معدي يقوم قاعد جنبه أهه بيریح شوية وده بيزعق وده بيزق !

ده أي جهاز ولا سرنجه موجود في المستشفى بيقتي عُدهه ومش بيخرج إلا بحساب وكل حاجة معروف مكانها وكل واحد عارف عهدته إيه ومحافظ عليها ، أصلها عُدهه بفلوس يعني ، إنما البني آدم في منه كثير ، لو راح عادي غيره موجود ، الكائن ده مش نادر وبالتالي ملوش تمن ولا له حد يعتبره عُدهه ويحافظ عليه ..

في الحقيقة أنا كنت فاكرة إن دي مشكلة في المستشفيات الحكومية بس وهيبقي الرد أصل الموارد قليلة وأصلها مجانية ومفيش فلوس نجدد والحجج المحفوظة دي ، لكن الحقيقة اتصدت لما بتكلم في الموضوع ده قبل كده وحد قالي إن الإهمال موجود كان في المستشفيات الخاصة وإن هو نفسه عاني من إهمال أدي لفقدان عيلتهم أحد أفرادها .. يا كل عامل يا كل دكتور يا كل مدير مستشفى يا وزير الصحة يا أي حد بيشتغل في المجال ده أرجوكم راعوا ربنا في الناس دي ، تحلّوا بقليل من الآدمية في التعامل مع المريض مش هتبقوا انتوا والمرض عليه !

رسم عهد

بعد المقال ده طبعاً متوقعه هجوم شرس من جهات كتير أوي الحقيقة ، الممرضين هيقولوا بسوء سمعتهم و مديري المستشفيات هيطلعوا يشجبوا ويدينوا و لو اتزنقوا أوي هيعملوا تقرير مصور كده عن التطور اللي بدأ يحصل في المستشفيات وأد إيه مع قلة الموارد بيحاولوا يصلحوا واحتمال يبدأوا حملة لتشويه العلاج الطبيعي كله اللي أنا منه وغيره كتير ، بس هرد بحاجة واحده بس هو فعلاً مش كل الممرضات بالصورة السيئة دي ومش كل المستشفيات كده بس للأسف الأغلبية محتاجة إعادة تأهيل لأنها فعلاً عامله زي ما تكون مولد وصاحبه غايب ومنظومة الصحة محتاجة إعادة هيكلة من جذورها ولو فضلنا نتعامل مع الموضوع بنبرة الدفاع يبقى نتحلي بالشجاعة بقي ونقول للمواطن اللي يتعب يقعد في بيته لحد ما يموت أحسن ، أهه علي الأقل هيموت وسط أهله بدل ما يروح مستشفى يشوف فيها معاناة أصعب من معاناة المرض نفسه .. نفسي يبجي اليوم اللي اكتب فيه عن حال المستشفيات اللي انصلح و ازاي اتغيرنا وبقينا نعامل الانسان بأدمية حتي لو إمكانياتنا ضعيفة بس بنحاول نصالح مش بندافع و خلاص

يا تري هيبجي اليوم ده ولا كلها أحلام وردية .

obeykendi.com



الاختلاف في الرأي لا يفسد للود قضية ، أشهر جملة ممكن تسممها
في مصر ، وبنفذهها ؟

لأ بنقولها بس !!

قواعد النقاش في مصر الحبيبة هي إننا نبدأ القعدة حبايب ونجُر
بعض في الكلام وزمي في النص جملة «الاختلاف في الرأي لا يفسد
للود قضية » وبعدها بثانيتين نشغل مبدأ « يا تقنعي يا أقنعك »
وكان ثانيتين ، صوتنا يعلي بألفاظ رايحه جاية وممكن نخسر بعض في
القعدة دي ، وده كله عشان إيه ، عشان آرائنا مش واحده ، آه طبعاً
هو الواحد مننا إيه غير آراء ويفرضها علي غيره وشوية حاجات فوق
بعض !

الغريب في الموضوع إننا ساعات بنتحمق أوي علي بعض
وممكن نخسر بعض عشان حاجات تافهه جداً وممكن نتخانق كان
علي حاجات أصلاً تندرج تحت باند الأذواق ، متناسين إنه «لولا
اختلاف الأذواق لبارت السلع » مع إن أصغر عيل عندنا في ابتدائي
حافظ المثل ده لكن إحنا بنحفظ عشان ندلق في الامتحان ، لكن

مع بعض بندلوق كلام يسمّ البدن ! .. أحمد جمال بقي مثال علي كل اللي فات ، للي ميعرفش أحمد جمال ده أحد المشتركين في برنامج آراب أيدول وصل للنهائيات وطبعاً مصر كلها كانت وراه وبتشجعه وعاملين حملات للتصويت للنجم المصري المنتظر لكن للأسف اللي فاز كان الفلسطيني «محمد عساف» وهنا كانت شرارة الخلاف في كل مكان وطبعاً الشباب الفيسبوكي لازم ياخذ فرصته في التعبير عن رأيه وإجهاض آراء اللي حوالية كان بالمرّة ، أيوة طبعاً يعني إزاي تبقي مصري وبتشجع واحد فلسطيني إنه يكسب المسابقة ! فين الوطنية ، فين النخوة ، فين القاموس عشان نطلع منه شتايم ونفضل نوجهها لبعض ، مع تزيين كلامنا بجملة هو عساف صحيح فلسطيني وكلنا عرب بس دي مصر يا جماعه مصر ولازم نشجع ابن بلدنا ، والعروبة فضلت قاتلة الشباب علي الفيس بوك يومين كده بعد ما كل واحد عمل بلوك لشوية حلوين من أصحابه بسبب جمال و عساف ، وسط اندهاش من اللي ملهومش فيها زي حالاتي ، أنا مش بسمع أغاني صحيح ، إنما أعرف يعني إن الغنا ده أذواق والناس في عشقها مذاهب ، ما كل واحد حر يشوف الصوت ده أحلي ولا ده أحلي ملهاش علاقة دي بجنسية ولا شكل ولا لون ، أنا بسمع صوت عجبني تمام أوي ، معجبنيش خلاص مش لازم أنغص علي اللي بيسمعه وأعملها مسألة أمن وطني ، خصوصاً إن بعدها بحوالي أسبوعين وفي وسط أحداث

رسم عقده

٣٠ يونيو والبلد مقلوبة كانت مصر كلها بتسمع «جمال» وهو بيغني لمصر !!

الغريب بقي إننا مسكنا في بعض من تاني ما بين مؤيد ومُعارض ، و بوسنات مليانة شتيمة رايحه جاية وشير هنا وهناك كل وظيفتها هي إنها تشعلل الدنيا أكثر وتقوم الناس علي بعضها أكثر وأكثر ، بس المرة دي الحدث كان أكبر من جمال وعساف وبقينا إخوان وثورجي ، والكل انقسم ، حتي البيوت انقسمت نصين واللي بيؤيد شايف إنه صح طول الخط و معاه الأدله علي تأييده والمُعارض شايف برضه إنه صح ومعاه الأدله علي تأييده وكأن مرتضي منصور علم علي الشعب كله وعلمهم جملة «سيديها توكو معايا» فبقاش حد بيتكلم إلا ومعاه دليل إدانه للطرف الثاني ومحدث عارف بقي إيه صحة الأخبار دي ، لكن المهم في الموضوع هو إن كل واحد يثبت إنه صح وإن رأيه صح ، وإنه لازم يقنع اللي أدامه برأيه ، ويا كده يا تقطع علاقتنا عشان آرائنا مختلفة !!

وهنا تحصل معركة البلوك الكبير ، ويكون البلوك هو الحل الأمثل للمهزلة اللي بتحصل ، وده طبعاً لأننا نؤمن بالديمقراطية وحرية الرأي واحترام الآخر ، والكلام الحُمصي ده اللي بنقوله وبنفذه بس لو احنا متفقين في الرأي ، لكن ساعة الجد «أنا الصح والباقي

مبكر سكوب

أغبياء ومغيبين » مع إنه الاختلاف اللي بيننا ده شيء طبيعي جداً
وربنا خلقنا كده وبيقولنا « وجعلناكم شعوباً و قبائل لتعارفوا إن
أكرمكم عند الله أتقاكم » سورة الحجرات ، الآية دي بتقر بالإختلاف
اللي بيننا وإننا أصناف وأنواع بس ربنا خلقنا مختلفين كده عشان
نتعارف ونتعلم من بعض مش نعمل بلوك ونخسر بعض !

الاختلاف اللي بيننا أجمل ما فينا بلاش نقلبه خلاف ونقطع
العلاقات و ياريت فعلا نعمل بـ«الاختلاف في الرأي لا يفسد للود
قضية » مش نقولها ونزّين بيها القعده وبس

عاوز الناس تحترم رأيك ، احترم رأيهم وانتماءاتهم ..

رسم عقل:

هي مبادرة شبابية لتغيير وعي المجتمع وإحياء مجد الأمة.

الرسالة:

رسم عقل الإنسان بكلمة تحترمه ويحترمها.

الرؤية:

بناء فريق ذو كلمة موثوقة في مجتمعنا من خلال نشر عدد من الكتب تتناسب مع عقلية المجتمع وإحتياجاته.

إصدارات أخرى لفريق رسم عقل:

بقلم / هبة محمد

أن تكون هستيريا

بقلم / هدير سعد

يوم واحد يكفي «سلسلة دواير»

بقلم / أحمد عبد الحميد

روح «سلسلة تحت الـ ١٨»

رقم الايداع / ١٠٧٦٨ / ١٤٢٠١٤ ط
الترقيم الدولي / ٦ - ٧٢ - ٥٣١١ - ٩٧٧ - ٩٧٨



مطبعة إبراهيم سالم

٠١١٤٤٥٩٥٧٥٧ - ٠١٢٢٤٢٧٢٣٢٧ - ٠١٠١٧١٨٠٩٣٨